



樂全先生文集卷第二十七

論事

論汴河利害事

臣竊惟今之京師古所謂陳留天下四衝八達之地者也非如函秦天府百二之固洛宅九州之中表裏山河形勝足恃自唐末朱溫受封于梁因而建都至于石晉割幽薊之地以入契丹遂與強虜共平原之利故五代爭奪戎狄亂華其患由乎畿甸無藩籬之限本根無所庇也祖宗受命規摹畢



講不還周漢之舊而梁氏是因豈樂是而處之勢  
有所不獲已者大體利漕運而贍師旅依重師而  
為國也則是今日之勢國依兵而立兵以食為命  
食以漕運為本漕運以河渠為主國初浚河渠三  
道通京城漕運自後定立上供年額汴河斛斗六  
百萬碩廣濟河六十二萬碩惠民河六十萬碩廣  
濟河所運多是雜色粟豆但充口食馬料惠民河  
所運止給大康咸平尉氏等縣軍糧而已惟汴河  
所運一色粳米相兼小麥此乃太倉畜積之實今

仰食于官廩者不惟三軍至于京師士庶以億萬  
計大半待飽于軍稍之餘故國家於漕事至急至  
重京大也師衆也大衆所聚故謂之京師有食則  
京師可立汴河廢則大衆不可聚汴河之於京城  
乃是建國之本非可與區區溝洫水利同言也近  
歲已罷廣濟河而惠民河斛斗不入太倉大衆之  
命惟汴河是賴近歲陳說利害以汴河為議者多  
矣臣恐議者不已屢作改更必致汴河日失其舊  
國家大計殊非小事惟陛下特廻聖鑒深賜省察

留神遠慮以固基本

論新法

臣蒙恩在朝備負經歲無施補益每為深愧今被命守藩旦夕出國門適值陛下以垂象之變降御札發德音勅宰司率在廷之臣直言過失改修政事之未協于民者當陛下憂勞之際老臣不為陛下開一言則忠義之語無復至於天聽上員知眷沒有餘責敢以聞見少報重恩臣聞天尊地卑而君臣之分定君君臣臣而後國體正天下安故惟

辟作福惟辟作威臣無有作福作威臣而有作福作威其害于而家凶于而國蓋為國之體猶權衡勢不可使有所偏重偏重之勢必成傾覆歷代成敗何不由此伏自近歲以來災異之作率由陰侵於陽陛下天縱聰明前言往事無不洞鑒不待臣說也今眩心所以答天戒青躬變禮可謂精誠之至謂天蓋高其聽孔卑故不旋日而星變以隱感通昭答足以明皇天眷佑我有宋之意至矣陛下應之以實固當踐所言矣夫政事之未協于民者



固有之矣大抵新法行已六年事之利害非一二  
可悉就中役法一事為天下害實深累經更變竟  
無長策可以定其法議論日以紛擾公私日以勞  
敝夫人為天地之心天地之變人心實為之故和  
氣不應災害荐作蓋下令如流水之原取其順流  
之易也經六年而事功莫効顧其事必有未協于  
民者矣法既未協事資必改若猶憚改人將不堪  
憂患一成噬臍安及陛下承六世之業上有二宮  
家國大事願陛下憂深而思遠寧忍於人情不可  
忍於社稷也憂患既成人臣各有去就之分家國  
之憂獨在聖人所以終日不離其輕重謂此也此  
臣所以為陛下痛心疾首一夕而九興也况今習  
俗奔競偷敝成風交黨相傾勢利相軋攻訐起於  
廟堂辯訟興於臺閣非所以昭聖化也毀譽移於  
好惡賞罪偏於愛憎非所以正王度也士大夫習  
尚如此有為國家死節伏羲臨艱虞而不易其操  
者歟昔堯舜之為君選于衆舉十六官而與臯瓊  
稷契共治天下猶且明四目達四聰而後能協和

萬邦雖大聖賢未有一人之心力而可以成天下之務也陛下臨御九年中外臣庶皆昭臨之下其間必有知忠義不二心之臣簡在聖衷者矣願陛下召之左右從容訪逮譬之金石叩之則鳴入各有心激之則發告人之辭寡告人訥於言外若不足其中誠也利口捷給外若有餘其中偽也惟聖鑒精察之若夫導之以言而不能盡者使陳之簡牘必有所効者矣前代明君莫不以是考于下故能廣視聽於扶同之外究得失於幾微之先攬其權綱執其柄鑄慮所以藏身之固思所以置噐於安此惟獨決於神斷而後可非所以謀于人者也夫事有失於前者不可不悔患有在於後者不可不懼如救焚溺勢不可緩緩則無及於救矣魚不可脫於淵國之利器不可以假人涓涓可以潰堤熒熒至於燎原釁端厲階不可忽也臣之心惟願國家之善政美事陛下之盛德鴻烈高越百王之上流光萬世之下天之福祥休嘉之象生而咎證之象不生民之愁嘆怨咨之聲不作而頌聲作使



兆民樂事勸功尊君親上欣戴安樂臣退就里田  
以至瞑目泉下猶知懷此幸願也老臣無狀為陛  
下慮不敢不精為陛下言不敢不盡亦惟陛下察  
此至誠俯垂省納實天下幸甚候進止

論募役

臣伏覩見行役法天下共苦不便陛下天高聽卑  
必聞其利害切恐中外臣僚未有為國家深憂遠  
慮精言其本末者臣既以方拙上荷知眷今拜章  
乞致仕方俟命解謝念言重思思有以補報而去

故不避誅絕上此奏封極陳保邦便民之大計切  
務非徒詭激以抗高論而已陛下至聖大明儻察  
臣言實有益於國家即乞發自清衷特下明詔停  
罷此法復行舊制之中有所未安稍為增損參定  
施行詔下之日四方萬姓若有匹夫匹婦不慰悅  
抃蹈上感德澤者則臣請受罔上迷國壞法亂紀  
之罪投放遐裔以正典刑若陛下猶謂臣言未足  
為信古者有大疑謀及卿士庶人協同而後有作  
即乞露布臣章俾在廷百辟以至諸路郡縣官吏

共得盡其公議二者惟在陛下發於神斷以定天下是非若但送之中書詢之執政無益也則乞留中不下非惟有以保全孤臣抑以致忠義之言以廣四聰之遠不勝為國憂慮區區之心惟懇明諒察所以劄子具別封進

論高麗使人相見儀式事

臣近見江淮發運司牒報高麗國進奉使人已到明州見赴闕前來次檢會先錄到樞密院劄子降下儀式一眷看詳內一項所至京府州軍知州通判

出城迎接管設餞送儀式伏見契丹國信使過北京只是通判攝少尹接送今高麗係外蕃其進奉使人乃陪臣也宣徽使班秩同見任兩府出城接送禮更重於契丹非所以崇國體示威靈也前次過南京雖已曾行新儀其時知府係兩省官今來接送管設相見儀式伏乞朝廷特行再定頒下以憑遵守施行

請防禁高麗三節人事

臣切聞高麗國進奉使人下三節人頗有契丹潛



雜其間經過州縣任便出入街市買賣公人百姓  
祇應交通殊無檢察所至輒問城邑山川程途地  
里官員戶口至乃圖畫標題意要將還本國自明  
州至京水路三千餘里昨淮浙飢疫公私凋耗國  
之虛實豈宜使蕃夷細知自諸邊關一虜入界謂  
之細作捉搦甚嚴今契丹之人與高麗相參遂至  
京輦中外動靜何事不聞漏泄國情深為不便伏  
乞中旨具立條制下引伴使臣令多將帶小心得  
力人緣路監防略比契丹夏州人使體例無令得  
與公私諸色人交關雜語外若示之禮待實以察  
其姦謀機事不密猶致患害况於蠻夷豈得不加  
羈束

請詳定盜賊條法事

臣竊聞山東河北頗有盜賊群行劫掠至或三數  
十人為火乘騎鞍馬被甲操兵器多是傷害變主  
驅虜民人遇捕盜官吏軍兵弓手即行鬪敵殺人  
放大恣為凶暴若更因之以飢饉嘯聚脅從切慮  
日益猖熾漸煩誅討舊制防禁盜賊之法鄉村即



有耆長壯丁弓手州縣即有廂虞候鎮將所由軍  
巡人立限捕捉若縣鄉有強惡賊徒不時收送即  
州郡遣職貢將校監督巡檢縣尉捕逐而又設賞  
賈之科召人告捕故賊可敗獲近制廢罷耆長壯  
丁而使保甲捕賊不許立限科較但令衆共量出  
罰錢鄉戶得力弓手徃徃放遣而雇募浮浪不逞  
之民以充弓手州縣相虞候鎮將所由巡防人等  
竊盜但令量行罰贖強劫盜第一限亦許贖銅其  
應科決者又許以別獲人數比折放免州郡將校  
職員舊得力人多已放罷見充役人亦不許別作  
差使惟告捕一科為禁防之助則有凶猶之人依  
憑法令已被拘執就禁輒自引服即從案問欲舉  
之法減死流二等便從徒罪定斷雖用配法乃有  
未至配所已復逃亡其告發之人憂懼讎報罕有  
敢告補者以此盜賊公行稍見充斥使諸巡檢縣  
尉實難以施其力本府近日強竊盜賊比徃前為  
多然尚於京東一路未曾有群盜入境諸州則皆  
有矣臣深思殄寇之意動為法制拘礙亦無以設



方略及檢會嘉祐以前編勅諸逃配軍作賊別作  
條曰立法加重新編勅刪去此條諸盜賊計賊定  
罪新勅復為增加賊錢數目而法減從輕臣聞法  
令之設所以除姦去惡安養良民未有以容姦長  
惡為法也夫盜賊者國之蠹蝨不可長也熒熒不  
滅至于燎原涓涓不塞至于潰堤前代未有不由  
盜賊而肇亂者也伏望聖神照察特降宸旨命取  
新舊禁捕盜賊律令別行詳定自州縣長吏應係  
捕盜官吏兵級精立賞罰條格頒行以禁止凶暴

安保萬民即今國家之深計重事也

樂全論諸路州軍關報邊事

臣竊聞安南九軍發離邕州已多日又頗聞一行  
士馬多染瘴疫頃來邊防事機不至周密中國動  
靜戎虜輒知昨三月末間單州公文連到廣西關  
報交賊事所經歷州軍甚多始至本府臣尋時收  
留止住不行竊料似此諸州展轉關報若至三路  
即吏民騰口事入戎虜伏望特行戒約嶺南荆湖  
江南等路職司使嚴切指揮所部州軍應行軍事

宜不得妄行傳報更相扇動樞機不密實損國威  
其單州公文謹封進納

樂全先生文集卷第二十七

樂全先生文集卷第二十八

表狀

賀皇帝加尊號表

三推脩籍禮畢於青壇兆姓樂推公上乎顯冊天  
人協契夷夏胥歡中謝恭惟尊號皇帝陛下寶玉紹  
圖淵珠在握稽乾文而布政鈞妙用以為方圓覆  
九區大冲群性雖上德不有故人無能名在後駘  
異文必功稱乎號是以帝堯則天之太皇軒體道  
之元加諸寶章未浮睿致臣心傾宸極身繫陪京



莫伸率舞之誠徒慶加享之會

賀皇太后加尊號表

臣庶等以陛下德對天儀功邁古烈奏誠丹陛贊  
國鴻休爰此吉辰誕膺寶冊宗廟增慶華夷共歡  
謝伏以皇太后陛下厚載無疆裁成百度躋含靈  
於仁壽浹和氣於清寧教始正家雅憲邁乎文德  
禮成見廟故事盛於和熹大業著於升平陰隲存  
於造化惟茂功之所被豈微號之能殫臣適遠龍  
墀叨司麟籥想盛儀而心驚望宸極以竟飛

光獻皇后上僊慰表

伏覩遺誥太皇太后奄違盛世聞誥號擗縻潰五  
情伏惟皇帝陛下至情大孝哀慕深切臣退伏田  
廬不獲陪位宮庭不任摧殞之至

光獻皇后靈駕赴山陵慰表

伏承大行太皇太后靈駕發引赴山陵者大升即  
遠萬國同哀伏惟聖情永懷攀慕大行太皇太后  
陰功庇世神御賓天尊極三朝實積貽謀之慶孝  
刑四海詎勝御恤之深臣退伏鄉廬阻陪班位瞻

望莫及殞咽推心

先帝上昇慰表

上天降禍大行皇帝奄棄萬國悲纏穹壤痛貫華夷奉諱哀號罔知所措中恭惟皇帝陛下性於仁孝罹此艱虞哀慕切深中外悸恐願思社稷之大計無徇魯憫之私哀臣以老病不獲奔赴闕庭無任哀痛感慕激切屏營之至

第二表

伏以大行皇帝奄棄萬國哀纏中外痛貫神人奉

諱悲號擗踊無任

中

謝恭惟太皇太后陛下義重天

屬恩深母儀罹此艱憂永懷痛悼願為無窮之計少割難忍之慈

第三表

伏以大行皇帝登遐遠近奔赴朝夕號臨况臣昔嘗備位二府雖請老家居猶當躬詣闕以盡哀哀慕顧以垂老父病兩目生翳起坐須人雖欲勉強其道無由慙負哀痛罔知所措

皇帝登極賀表



伏奉制書今月五日皇帝陛下嗣登寶位續服先  
猷中外聳觀華夷同慶中恭惟皇帝陛下英風冠  
古世德在民煥乎天日之姿卓有祖宗之烈民心  
所在神器自歸如天作春萬物有向榮之意如日  
出地四海無遁照之心眷茲神人永有憑奉臣以  
老病不獲奔詣闕庭無任歡喜踊躍激切之至

賀太皇太后同聽政表

伏奉今月五日制書太皇太后臨朝聽政者天覆  
地載八方以寧春生秋成萬物乃遂民心既定國

步自安中謝恭惟太皇太后陛下輔導兩朝儀刑四

海襲治世之故事繼先后之永圖屬茲難疚之中  
實負安危之望共聞大政勉副誓言人神有依華  
夷胥賴國之大計萬世以昌

慰皇太后表

大行皇帝奄棄萬國奉諱之日哀殞忘生成服以  
來擗踊無地中謝恭惟皇太后配德宸極助治宮闈  
崩折之憂既下同於萬宇攀號之痛又身先於六  
宮臣以老病不獲奔赴闕庭無任哀痛感慕激切

屏營之至

慰皇太妃表

大行皇帝奄棄萬國洪覆圯裂群生震搖凡有識  
知舉增號慕中謝恭惟皇太妃奉侍朝夕左右聖神  
遽罹下席之憂永抱終天之痛

賀皇太后表

伏奉制書今月五日皇太后光奉國章誕膺冊禮  
允在臣妾知有依歸中謝恭惟皇太后殿下內德茂  
於先朝母道隆於嗣聖恭儉之美上繼周之姜任

孝茲之風下掩漢之馬鄧豈獨盡天下之養蓋將  
明王化之先盛禮既行多方同慶

賀皇太后妃表

皇太妃誕膺令典受冊內朝受禮傳聞四方同慶  
中謝恭惟皇太妃功書女史德配周南早以虞嬪之  
休遂儲堯母之慶坐論婦禮既師表於六宮誕生  
聖明實本支於萬世恭聞盛禮實慰群心

賀皇太后受冊表

致六宮之肅雍備四星之光耀國章畢舉實繫中



外之心陰教益明式顯廟朝之重謝中恭惟皇太后  
同德聖期儷尊宸極成周之盛任如繼於徽音東  
漢方隆陰馬招於內則式陳寶冊上正母儀普率  
承風拊蹈胥悅臣久違京闕退伏田廬聞命有初  
為國同慶

賀皇太妃表

盛禮斯陳徽章式備國之慶事天下歡心謝中伏惟  
皇太妃地重星闈德隆宸壺重光累盛上參中烟  
之榮積德累仁允穆普天之望

慰茲聖光獻皇后神主并耐表

伏承茲聖光獻皇后神主并耐太廟禮畢者因山  
復土已掩於下宮耐廟安神肇開於拓室宸衷追  
慕綿寓同懷謝中伏惟茲聖光獻皇后配極居尊倪  
天為大對勛華之盛旦越任如之徽音國體端嘉  
功出九入之上孫謀丕顯治超三代之前展龍駕  
以賓升復龜臺之舊御寢園載肅虞輅初迴昭穆  
有嚴式序宗祊之重蒸

賀聖躬痊復表

伏承聖躬康復已於三月一日御紫宸殿視朝者  
擁全衆福臨聽萬機含生與聞舞手相慶謝中恭惟  
尊號皇帝陛下王承駿命光宅永圖上全虞舜之  
聰明中盡周文之抑畏雖甚盛德未嘗輒安將大  
有為無敢自暇至若一穀不登則憂見於色一夫  
不獲則慮形諸心于夙于宵以詔以訪僅踰三紀

常御太和茲極神明之勞偶爽晦明之適然而天  
地敷佑祖宗降休百靈陰相於前萬俗精虔于下  
粹氣來復淵衷寢清保社稷無疆之期為朝廷莫  
大之既臣早從外補越在西涯第思宸宇之深嚴  
阻預簪紳之蹈躍

賀冊貴妃表

得本州進奏院報今月三日貴妃受冊禮畢者徽  
章有煒茂典聿脩臣子之心中外胥慶謝中恭惟尊  
號皇帝陛下王承寶太上光闡皇圖凡議禮文必  
御名



考本朝之故事誕享德度舉協前王之令猷疇壺  
掖之賢明成家邦之風化若時吉日備禮大廷敷  
厚人倫足致闡睢之應裁成內治永操彤管之光  
臣限守郡符方遙象闕徒心馳於宸極阻手舞於  
天墀謹差都教練使張遵道奉表詣闕稱賀以聞

代中書賀壽星見表

司天監狀奏今月十九日戊申其夜五更五點後  
於丙位瞻見壽星出見赤而光大者秋氣方清曙  
光微動爛然珠彩宛在丙方考日官之獻占知睿

算之無競

中伏以

三辰垂象所以示人五福敷言

莫先惟壽觀景祥於南極驗愷悌之萬年恭惟尊  
號皇帝陛下寶命在躬乾圖紹統治民祗懼事帝  
寅威故鑒祐於有仁用永錫於難老惟享國之永  
若商之中高顧當天而王如古之巢燧臣等愧非  
一德忝列三司覩此休符倍萬忻慶

謝賜御飛白書表

今月某日伏蒙聖恩賜臣御飛白書一軸者仰拜  
綸言甫啟緘滕之祕恭瞻宸翰恍驚輝照之臨謝

中謝

臣聞書之俊竒法傳飛白得諸心而方妙應於手  
以如神惟我太皇若時多藝高出肇昔孰為擬倫  
恭以尊號皇帝陛下繼聖恢圖無為御宇顧萬機  
之臻靖咨八法以宣精祖則茂昭睿功允緝因齋  
居之多豫灑逸筆以為娛以臣久塵侍橐之華近  
被于藩之重特加寵錫曲示眷私俯俛以觀徘徊  
增惕重有同於分噐榮實過於笥衣神物護持恐  
難留於私室世家傳保當大庇於宗門臣方迫嚴  
涂無繇躬謝

謝賜御書表

臣伏蒙聖恩賜親書一幅天語溫純煦若春陽之  
景宸毫璨麗煥如星斗之精褒逾華克之章捧過  
鴻鈞之重臣道原殊淺學殖久蕪早塵兩禁之游  
遂玷三朝之遇陛下宸襟縱邁天稟濬明妙萬物  
以為神乘六龍而比健豈臣庸陋得望清光灑潤  
及於蕭斯委照通神鄙隙逢時之渥傳後為榮仰  
服寵靈深倫骨髓

進慶曆編勅表



恭聞聖人之於法也揆時設禁察失建防律令統  
於本原詔教縫其漏隙世輕世重參制呂刑之權  
新典平典互存司寇之職然則通其變者未嘗使  
倦歸於治者不必相沿更化適宜由來尚矣臣等  
中謝竊以宋興受命垂及百年制勅之文累經編定  
造邦則綱目粗舉繼世則禁約彌周又刑統輔乎  
建隆農田析於景德附令輕常憲之犯減定省中  
覆之煩要取便入迭為救弊其間執文生意吏所  
不免緣令興詐人所必為語不直宣則奏請生於  
未曉法雖曲處故比例興於一時由是報讞浸多  
文書彌積官雖行下民罔究知旁緣為姦承用差  
駭網逾密而禽駭策雖弊而馭勞必待刊修乃能  
折中伏惟尊號皇帝陛下燭知治本茂建民中既  
清問於群工思更始於多辟而舊條浩廣後令煩  
挈或月異而歲不同或小得而大有失矧乃俗無  
定化法貴善更不徇古以礙今不執此而妨彼譬  
夫調瑟易柱順燥濕而扣音虞機省括度高下而  
求獲乃頒明命改緝懿綱仍詔臣等傳舉衆俺並

咨先例置司率屬舉要申凡於是以尚書屯田員  
外郎臣奕等刪正其文翰林學士臣某等詳處其  
當臣昌朝臣育典惣其任尋據天聖編勅為始下  
盡慶曆三年續降宣勅凡得四千七百六十五條  
極慮研精彌年論次因事標目准律製篇擿除重  
復揚擢輕重增所宜立周所未詳一詔而該數罪  
者從類析科數勅而申一事者併文示簡向以損  
益未定首末或乖須訖纂脩方咨處可露奏前上  
俞報實頒又詳天聖編錄之時勅不著年春無先  
例遂使法家無指用之限諸條有疊出之文今每  
勅繫年存舊體也先卷發例省煩文也其言某年  
月日勅者則盡如元降言某年月日勅詳定者則  
微加脩潤言臣等參詳新立者乃是衆議建明務  
合大中庶全體要又念折杖之法創始本朝上聖  
卓行前王未悟故取自刑統寇於本章且俾群吏  
曉知王制明白其中書門下樞密院聖旨劄子批  
狀條今來纂錄者悉改曰宣勅總一千七百五十  
七條離為十二卷并總例一卷目錄三卷又取勅



內汎行約束者為續附令勅一卷及錄到續降赦書德音三卷合為一部如得允當即乞特降勅命與刑統令式及先編附令勅一路一州一縣勅兼行蓋以室詆欺之塗略苛細之弊義歸畫一人得共規文淺則用者明語約則該者廣由天地之化確然易知侷江海之流大而難犯若使吏能明習官謹奉行不為惠於法中不游情於法外庶可杜塞竒請追庶獄之號平銷戢爭心致黎苗之遷善臣等謬膺遴選殊懼大猷探理略以服勤惕奏期之淹脫粗終研削少佐例成或許頒行仍乞以慶曆詳定編勅為目其新編勅共二十二卷謹隨奏上進以聞牒奉勅宜令崇文院雕印頒行

謝賜熙寧編勅表

伏蒙聖慈賜臣熙寧編勅一部者伏以建邦之治本原在乎典刑禁民為非綱紀繫乎法令屬當平世簡用祥刑式助四維允成三德中謝恭惟皇帝陛下體天為大如日之中燭於象表之微制此天下之勳俯觀時務旁察人情時惟適以為宜事何久

而不敝正夫一者百慮可以同歸變而通之萬民  
於茲不倦故講於靈制俾論次於新書雷電合章  
金玉條理緬合大中之訓益昭欽恤之仁甫畢刊  
摹爰加頒賚臣幸緣近綴忝守輔藩方恭命以奉  
行思揚吏職復蒙恩於降賜永獲家藏

滑州謝賜新日曆表

王官底日考曆以正天端候御奉時告朔而賦民  
政謝中伏以尊號皇帝陛下乾圖紹統寶數在躬推  
軒策於明堂五氣以治合舜時於方嶽七政以齊

臣罷職禁林分符畿服捧新書於芝檢增舊戀於  
冀階

南京謝賜曆日表

居卿典曆太史序時憲治象於庶邦大王正於一  
統尊號皇太后陛下厚生著德大順御期撫節以  
推天元履端而謹政始氣物惟叙機祥薦和爰頒  
朔於海寰俾示人於歲事臣忝由禁署分守陪京  
捧迎日之軒書切望雲於堯屋

秦州謝賜曆日表



清臺謹職俯畢於新書法坐推思亟行於諸夏撫  
封載遠拜賜為榮謝中恭惟尊號皇帝陛下乘正御  
乾順古敷化海於內外盡陶於太和天之後先率  
有於常應然猶命南北之正記昏明之期自始而  
終能究六家之法惟疎與密且歸五紀之文序作  
歲言布為民事凡舟車之所逮且郡國之相維悉  
用頒宣庶令奉順而臣復從外補越在西隅會承  
詔檢之嚴得見辰猷之重謹當恪思睿訓昭諭編  
低不獨示元聖受時之休抑亦知仁生物之意

讓除諫官表

今月二十一日閣門領告勅一道授臣直集賢院  
知諫院事者膚短之材孤遠之迹選除忽及愧惕  
無涯謝中伏以國家分命百工並罄衆務惟茲諫職  
實裨治要自非僚履約乎中道處議得其遠體詳  
曉事物該知典故有大制度能深沿革之本當大  
施舍能折損益之中苟塵獻替之地是貽朝廷之  
辱况今陛下勵精於上大臣宣力於下聽納不倦  
謀能並進是方輯明紀律式遏寇暴宜得通識上

助有為衆材森如多士萃止上東天春豈少臣者  
儻陛下矜其愚而錫保全之造公朝體其介而敦  
愛育之仁許臣且以舊官就館供職上免曠官之  
咎下逃十指之譏茲實由衷之私竊積聽卑之望

謝除知制誥表

伏奉制命蒙恩授臣右正言知制誥者槐庭給札  
甫上於奏篇星掖代言遽陪於景從躡進論思之  
秩預聞慈密之謨俯俛倭拜嘉競凌失次謝恭以拜  
家所重典誥為先故廣延於翹英俾對司於名命

尚書作詔任慶機衡內史出方替為爵祿蓋歷朝  
之極任為外廷之華階向非學本名家代推傑筆  
則何以發揮鴻業徊翔近班體漢家深厚之辭演  
周公煩悉之誥訐莫定命鼓舞乎萬方除書德音  
竦動乎群聽備諮訪乎政事專潤色於王猷必資  
東里之才取重西臺之望伏念臣斗筭微器擗櫟  
散材獨奮草茅之愚再舉方聞之目小冠宰邑式  
敷慈惠之經別乘贊藩無補中和之職無何被旨  
即追還臺陞處樂卿之丞留充諫省之缺赤墀伏



奏曾未逾年右史記言仍僭備位自量末至無此  
數官惟內鑿於朴忠可少紓於官責汲黯之言多  
忤寔荷優容鮑宣之義少文粗存體要免譴斥之  
為幸曷思榮之敢圖猥被寵甄遽承官乏內省而  
愧外言謂何此蓋皇帝陛下洪覆如天至仁育物  
脩官以一乎統類施命以告乎方來思皇俊乂之  
才裁成溫雅之號詎宜輜淺玷此敷求謹當䟽瀹  
煩襟厲摩素業關決六曹之議深務持平覲脩四  
禁之規豐能謹職敢言論報蓋遠顛擠

西垣陳乞外補狀

臣幸以微才濫當書命去本朝而就州郡捨辭翰  
而趨吏責蓋不獲已豈所願為臣堂有二親年向  
衰老母氏抱疾多歷年所自臣登仕再任泐中迎  
親就官樂其風土今來外制見有五員臣出領州  
餘足供職伏望聖慈許領江淮間一郡矧今疆場  
之戍未解中外之事頗繁萬一闕人選任誤及不  
惟自知愚懦實亦迫此私誠臨時有辭愆為臣之  
義遺親冒寵乖為子之方臣若旁有兄弟或下有

子姪供養有託何憚奮身緣此區區尤不遑處仍  
恐物議不察臣誠以謂多事之時猥為便私之請  
占掖垣之近職擇善地以自安臣乞解綸闈換一  
散秩若秘書學省東宮之官資請品高典藩亦重  
矧茲官號久不補除散要遞居願從臣始仰祈天  
造俯鑒愚衷戰汗屏營伏候 勅旨

謝宣召入院充學士表

今日翰林待詔劉文蔚至臣所居奉宣聖旨召  
臣入院充翰林學士星車傳命玉署參華才薄恩

隆以榮為懼竊以學士之職盛於有唐本朝右文  
其選益重間蒙訪逮得効論思地處深嚴紀為清  
近服四禁以謹職業詳七制以贊訓言諒匪通才  
豈當妙東謝中伏念臣幸緣儒服竊覲仕階濫肩四  
方之豪曷明三道之要大庭發策再矚帝揮東觀  
紬書亟游俊域荐塵事任粗守官箴內省顛蒙已  
塵賞拔豈謂皇帝陛下軫憐孤特矜茲拙艱記演  
綽之微勤涉浮鼈之近綴斗無挹酒之用鶴有乘  
軒之譏謹當自求履祥緬思典故體翼風而申令



當勵深辭瞻法履以在顏勉承切問冀少圖於來  
効諒奚報於鴻私

滁州謝上表

昨蒙聖恩授臣依前右諫議大夫知滁州軍州事  
已於十月初五日到任上訖近班就列早玷於清  
途便郡庇身復蒙於善地荷天之寵循分知優謝  
臣緒閥單平材用踈短謬登詔選叨處仕途通籍  
朝闈濫中儒館擢陞兩禁用踐群司粗逃官尤曾  
微風迹比因病日不堪簿領之煩遂剖丹誠求還

大翰之職清衷加恤慈旨垂矜得就閑曹少安散  
質事有之忽議生疑似之間睿監孔昭朝論惟允  
領麾殊幸省已載兢又日月之光榮陪法從忽到  
淮山之上悅復塵寰值歲大穰與民同泰俯仰優  
足出處便安此蓋皇帝陛下一氣均和二大圉廣覆  
動植之物並被生成之仁三小大之臣咸何保全之  
造矧在孤微之迹四嘗叨任遇之恩拙守有常厚誣  
已辨敢不勤恤民瘼恪謹官箴冀勉樹於教條期  
少資於化育

以寧府謝上表

三月二十三日進奏院遞到官告勅牒各壹道伏蒙聖恩授臣依前官充端明殿學士移就知江寧府仍放朝謝者已於四月十七日到任訖叅華祕殿被寄名藩從便道以致行奉寬條而署事寵榮蕃集媿汗交流謝竊念臣世係單微天資蒙淺禱巾未久通籍為榮乘善養於群材遂叨塵於顯列沾河漢之滋澤依日月之光華寢親戶牖之嚴備更臺閣之要物勝權而衡殆形過鑑以照窮乂冒龍光倏罹箕舌仰繫能哲俯察所存寘兩省之近班假一麾於便郡危心未定渥命亟頒鄩屋照通陳根脉起垢疵悉蕩坵陶更新此蓋皇帝陛下大度開容至仁涵育鑒丹誠之不昧知拙守之有常申穆朝猷曲回天造禁帷密職復近穆清之塗方面通都俾當雄重之地敢不精心以慮來効是圖庶有獲於涓埃用酬恩於天地

服除再授端明殿學士兼龍圖閣學士給事中謝恩表



伏奉制命授臣某官者禮方終制恩許還朝入覲  
黼帷邈清光而在望登陪藻幄遙近綴以為榮謝中  
伏念臣才匪通方器慙適用從鄉人之善者幼擇  
與遊玷國士之品題早塵上達荐承詔選遽躡仕  
階見推英俊之場周歷華要之地比繇禁署分領  
翰垣不圖釁罰之深靡究劬勞之報久纏病苦無  
望生全况晷景之不停悵几筵之已徹仰膺茂典  
俾復通班再趨戶牖之嚴仍處閨帷之密比蓋尊  
號皇帝陛下大圓周覆一氣均和軫塵露之舊動  
收箕斗之浮象匪遺輜曲同被範圍敢不進念竭  
忠退思寡過日月獻納庶盡近臣之規夙夜切磋  
以勵在公之節少期來効上答鴻私

除尚書禮部侍郎知滑州讓遷官表

伏奉制書以臣差知滑州特遷尚書禮部侍郎者  
旬服陪京首膺東眷春官小宰仍假寵名獎受有  
殊兢憂無措謝中臣論材譎薄語道迂疎親逢樂育  
之辰屢塞方聞之詔誤蒙恩記嘗歷事權嚮解禁  
高連紆州組契闊江湖之遠流離歲月之賒近趨



丹陛之嚴復預紫垣之近激揚懦氣仰奉清光伏  
遇國家示壯邦畿增崇屏衛屯兵慎擇守臣豈期  
玩印之咨首訪遺簪之舊遷二六官之重用優三  
輔之行無鎮撫方面之勞有息嫗鈴齋之樂論  
今地望雖體大而勢雄較昔官居本事稀而身逸  
過加賞利恐累典刑若非此際懇辭必啟後來徼  
倖况臣職叅殿幄官處瑣闥久塵侍從之華足頌  
藩宣之寄曷煩麗澤方重左符伏望尊號皇帝陛  
下特寢新恩許還舊秩往釐州務躬布詔條雖去  
君前稍違於戶牖顧居寰內何遠於本朝仰祈寬  
大之慈曲示保全之度俯回照鑒垂諒由哀輒干  
九死之誅冀一介之守所有勅誥未敢祇受

知滑州乞免轉官劄子

臣伏奉勅告授尚書禮部尚書差知滑州近者朝  
議升曹滑等州為輔郡增置兵衛以壯王畿所遣  
守臣緣此誠重然滑州本實閑僻公事絕希無宣  
力之煩非藉才之地更起遷官之例恐開後倖之  
途又環都五州並為陪輔知州在任遷易不常必



待加恩而行益滋干賞之濫况臣官叨兩省職居清近出當屏翰體亦非輕臣前日欲先陳論又慮涉於辭避故且受命須至上言伏望聖恩許臣只以舊官前去赴任慎重名器茲為治本在臣之分亦獲自安

謝遷禮部侍郎領郡表

臣某言伏奉制命以臣差知滑州特授臣尚書禮部侍郎者近服建侯地升三轉中臺分次官二六卿併荷褒榮交深愧懼謝中臣世憑儒素天與朴忠

幸遭重雍之辰濫膺特起之詔造而干祿兼冀親井輕藁鑿以獻言累送駸問蔑聞塵露之益空收箕斗之名頻煩寵章進點清貫嚮問關於補郡方契閣以還朝重趨丹陛之華再預皂之綴喜從遐邇獲際近嚴嘿務安恬絕希僥倖會深議崇畿甸之迹封盛修官儀推峻地望遙邱北門之舊首蒙左竹之咨謂密附日圍雖居重寄而輕辭天仗亦動淵衷因假儀曹示優禁從露囊封而啟讓承汗號以難廻載省無功徒堅自訟此蓋伏遇尊號皇



帝陛下曲垂眷覽俯暨寒蹤念昔誤知非緣黨援  
推今同類每異矜憐偶賜節以殿邦猶出綸而增  
秩敢不祇循條教恪佩訓詞徃殫夙夜之誠少答  
乾坤之造

免知益州表

今月十五日遞到告勅各一道伏蒙聖恩授臣端  
明殿學士兼翰林侍讀學尚書戶部侍郎知益州  
軍州事者左戶美官西區重寄敢期推擇俯及庸  
虛驚惶失圖進退無措中謝臣涉獵經術遭逢聖明

越分踰能連階累任周旋侍從之職踐更清要之  
途風議無長猷為弗建向終宜制擇守輔藩報政  
靡聞方積簡書之畏陟思逮下遽當方面之行地  
官亞卿坤維巨屏寵靈殊渥跼蹐為增念臣父當  
傳老之年而臣抱終鮮之戚有息皆幼于宗弗蕃  
顧溫甘之所須豈晨昏之可舍惟拜嘉之誠厚敢  
有覲以自居情所不安義亦何處伏惟尊號皇帝  
陛下宇宙同廣耀冕並明測遠方之民深期於鎮  
輯訪大廷之議誤致於東掄駉治難逢私懷為迫



敢朝遠照俯及丹衷布朝家天地之任狗臣子庭  
闈之志追寢成命選除通材他日損生敢惜螳螂  
之臂此時反哺幸伸烏鵲之情輒竭寸誠仰祈洪  
造

免知益州劄子

臣伏蒙聖恩除臣端明殿學士兼翰林侍讀學士  
尚書戶部侍郎知益州已具表辭讓章奏之文不  
盡誠悃敢披愚懇再贖天聰伏以益州方面至重  
朝廷委任推擇至精臣以庸虛猥當東寄濫加崇  
秩榮兼近職揆才揣分忝冒逾涯但以父年高傍  
無兼侍昨受秦州之命亦嘗緣此自陳事播朝班  
言存聖聽况今益州除授寵利兩優雖國家任人  
自有大體而縉紳所指實貽清議敢望大明委照  
洪慈亭育垂憐拙守加憫孤蹤許臣以見官留滿  
今任大馬之力期後効於驅馳烏烏微情庶獲伸  
於哺養望闕待命不任殫越

上殿再免知益州劄子

臣近被勅命差知益州奉表及劄子以親老乞且



終滿滑州見任准中書劄子奉聖旨不許辭免又  
聞已差梅摯知滑州亦有朝旨不許辭讓梅摯緣  
輔郡加職已朝謝臣於事體難為更留本郡今奉  
恩旨朝覲獲對天顏敢再瀝懇誠上黷宸聽伏以  
益州方面甚重朝廷寄任非輕臣以庸虛誤膺推  
擇便當策勵駑鈍徃度詔條但以臣父年俯傳家  
而臣終鮮兄弟賤息尚幼未堪承事義難違遠苟  
冒寵靈敢望聖慈垂矜愚守俾循陔之志獲展於  
盛朝則圖報之心誓伸於異日臣無任激切待命

之至

益州謝上表

蜀控西面益為大藩臨守之難畀付惟重茲既署  
事實深惴懷謝中伏念臣資地本寒機晤殊淺偶緣  
朴學進會休辰久塵侍從之塗荐更華要之地曾  
微云補之効第忘內疚之憂一昨起奉慈宸出分  
宸服烏烏之情甚樂犬羊之轡自宜適偶清衷深  
圖遠御庸殿一都之會專鈴兩道之兵枯朽見雕  
歎段仍駕復冒寵陞之命無容固讓之私錦里舊



城陸海千里軍屯整睦民俗阜康訟事不煩遨嬉  
多暇此蓋尊號皇帝陛下內全哲惠旁達聰明謂  
常預於樞機知頗存於謹厚可行寬詔以撫遐方  
謹當精究事為脩明紀律翼成安緝之効持答聖  
神之休愧覩瞻天跼躄無地

益州謝詔書獎諭表

進奏院遞到勅書一道以益州路轉運使奏據本  
州吏民乞留臣滿三年伏蒙聖恩特降獎諭者錫  
命自天悅日星之下燭躄身無地慄淵谷以內驚

惟功善之不聞冒寵靈之誤及省循無狀愧慙兼

懷中謝臣聞漢宣帝之厲精留思良吏唐明皇之求

治注意外官然如膠東潁川治有異等之効濟陽

河內事昭將順之誠方被璽書之褒而蒙絲言之

飾前朝盛事舊史美談如臣者所蘊虛疎見拔孤

遠早玷清華之選久陪英俊之游頃自禁嚴外分

藩翰維益部一都之會據坤隅千里之疆氣俗剽

輕貨利繁錯比守臣之殫治習舊事之便且居然

方面之雄稱為權寄之重獨顧行能之下亦叨推



擇之行然頗知獄市者為政所先賦役者治人之  
本戒諸苛擾務在平均良用拙勤粗免隳斲不意  
吏民舉浮淺之迹朝廷敦獎勸之方細扎十行置  
郵百舍善聲不著方虞責問之來榮號所加適取  
虛名之請此蓋尊號皇帝陛下凝神象表垂統化  
元盛節隆乎中和美利充乎高厚君視臣如心膂  
允謂至仁天自民之聰明故無遺聽百城聳觀遐  
俗知榮臣敢不上體宸慈下修官業率勵愚柔之  
性無怠百千答揚覆照之恩少俾萬一

謝除三司使表

伏蒙聖恩授臣依前尚書戶部侍郎充三司使者  
駟遽奔塗虔趨於嚴召芝函錫命進昂於寵光俾  
專筭計之煩實玷難才之選勢名叅重醜汗交盈  
中謝伏念臣撲鄙孤生孱疎近畧夙選堯文之郁荐  
膺漢詔之求縹組朝闈濫巾儒館職箴規於獸省  
記言動於螭塗蒙擢掖垣遂登禁署中司執憲會  
府理財蹉跌外除因循十念比自日畿之近徒臨  
蜀表之遐勉布寬條汜寧遠俗績幽亘絀覆廣惟



私丞蒙瑞節之華歸奉燕朝之覲不謂尚存眷眷  
前出制音繇左戶之班聯商大農之功利夫以會  
計之重賦入有經惟貨盈虛繫時休戚方今邊警  
雖徹而列屯猶厚年穀鮮登而沉冗為多調度既  
繁儲用幾廢豈宜懦品竊假要權此蓋尊號皇帝  
陛下乾健垂明宸慈廣愛誤以愚朴目為幹臣謂  
歲代之最深久更已試察羈蹤之自立素不因入  
優以職儀俾之器使敢不力求姦弊顯講富疆事  
有可為因自宜於竭盡衆之所避亦無憚於設施

誓堅忠盡之誠上答東求之造

乞免三司使不允謝答詔表

伏蒙聖慈以臣近上劄子乞解職出知鄆州特賜  
詔書不允者備負主計歲涉再期辭劇請藩章凡  
六上荷淵衷之憐惻紆重札之丁寧仍示撫存未  
容罷免內循孤拙愈極兢危謝中臣慶曆中擢自憲  
臺長茲會府于時齒髮方壯精力尚彊雖趣辨應  
猝之非長獨居官任職而無廢早以目疾求解利  
權久方開俞得還禁近自爾出入中外奔走川塗



更歷數州又逾一紀嚮罷坤維之守志圖近郡而  
行遽被詔除復膺使任臣聞命之始即以舊疾為  
言就職而來每以曠務為慮蓋財用之均節繫剖  
析之謹嚴急之則害於農商緩之或容於姦利責  
其簿頌之効實在省察之明而臣心之精微比頃  
年而亦耗日之矻眊迨近歲而有加或苦勞瘁乃  
移告謁因控懇誠之切屢形封奏之詳願停三使  
之浩繁竊丐一麾而休息公議幸寬於譴効朝恩  
亦盡於優容實陳力之不任非無名而罷去豈謂

尊號皇帝陛下俯矜愚守早綴近班不違道以求  
全頗著誠而無偽再頒溫詔曲諭訓言重念臣所  
苦未平知份頗熟儻精神之可強顧煩冗以何辭  
但懼眩昏致隳重害雖虛懷容納俾收累乂之勤  
而列削干祈米免再三之瀆至明垂鑒丹悃寧誣  
謝兼翰林侍讀學士表

伏奉制書以臣差知秦州授臣兼翰林侍讀學士  
者塞垣謀帥議及孱材講席敷經恩加異數仰膺  
睿獎交憐危悰謝中臣本起寒生親逢盛旦兩運軒



陛之問連策艸茅之愚空竊虛名曷俾要務遄彰  
纓於諫署即珥筆於史林仙掖代言禁坡眎草頌  
中司而特憲專大計以治財皆憑誤知茂樹成績  
嚮從州寄頻換歲筭復邁母憂退樓里閑近奉明  
庭之對重趨灑從之班雖荷德音屢矜滯迹自循  
拙守方避英游閑局冷司無關於朋比陳編嘉簡  
更績於見聞其謂邊將終更睭宸擇守俾自承明  
之直往提戊己之屯陛特索於書筵命擁旄於藩  
閫載言會幸奚塞疇咨此蓋伏遇尊號皇帝陛下

濬發皇明旁求介善不責全於士類嘗畱舊於臣  
隣曲記小忠曩經煩使因推光寵以峻事權况臣  
陪殿幄之疑嚴典閣圖之奧祕如評榮進已慶美  
階今無講勸之員愈重論思之職暨引章而懇避  
承垂詔以敦臨帝意難辭人言可畏為儒薄分於  
叨曷以固多報國私誠在効酬而都淺惟益虔於  
夙夕庶少答於涓埃

南京謝上表

伏奉制命除臣端明殿學士兼龍圖閣學士守尚



書左承知應天府兼南京留守司已於今日十日  
到任上訖陪京分守實王業之所基故社言歸在  
仕游之為寵肅膺期命已布守條中謝伏念呂植  
性冥頑逢時熙盛荷聖神之眷察繇文史以誤知  
漫歷歲華宙緣人乏詞垣禁署間黷詳延憲府計  
籌嘗塵器使斥麾去國就日來朝洎蒙右蜀之遷  
復有大農之召司均九式顧調度以靡克營職一  
心亦勩勤而敢殆叙升省轄出領留都仍還籍於  
禁嚴示推慈之渥洽此蓋尊號皇帝陛下幽而必  
燭覆以無私隱其有不移之愚俾之以自求之福  
典茲宮鑰之重綽然里閭之華顧莫稱於恩光徒  
有慙於委寄撫心自省當益勵於乃脩有軀可損  
尚更圖於所報

辭免知秦州奏狀

今日十九日進奏院遞到勅告各一道除臣工部  
尚書秦鳳路兵馬都部署經略安撫使兼知秦州  
者秦州重鎮尚書重官伏蒙聖恩俯及孤外在臣  
虛薄豈堪眷委兼臣父年老久患脚膝不任騎乘



關隴山阻實難迎侍遠行敢望天慈矜察情懇特  
賜追寢新命許令終滿非今在但便臣庭闈之恭抑  
免誤國方面之寄所降勅告未敢祇受

謝賜手詔第一表

今月初八日進奏院遞到賜臣詔勅一道以臣奏  
陳為父老乞免秦州滿今任不許辭免便令受告  
勅發赴本任者賜命自天烜日星之下燭躅身無  
地慄淵谷以內驚進退徊徨啟居震恐謝伏念臣  
性資疎拙自奮單微實乏出倫之才誤蒙不次之

舉寅緣資歷躋躡顯榮向解計圖叨司留鑰榮歸  
故里恭展私庭曾微治効之聞敢異光靈之及伏  
蒙尊號皇帝陛下俯矜愚守久綴近班進文昌八  
座之聯委西州一面之寄惟是行能之下忝茲推  
擇之行天地生成曾未侔於全度形骸損廢固莫  
報於深仁曷敢遂巡妄為激潔但以臣父筋力已  
謝齒髮寢衰老德訓人不責便親之請愧心即路  
是專冒寵之懷被細扎之丁寧增懦衷之墮獲粗  
致其樂願伸一二之私深察其情儻宥再三之黷



辭免第二狀

右臣昨蒙聖恩除工部尚書知秦州以父老患脚膝難以迎侍遠行尋具奏陳乞滿今任本月八日伏奉詔勅不許辭免便令受告勅疾速發赴本任者臣已具表稱謝外敢傾私懇再贖天威伏以寵命遷除邊防委寄猥加虛薄實冒恩榮前所陳情非緣矯激臣父年逾七十脚膝早衰跋履遠行艱於騎乘臣去年外補上荷天慈陪都鄉里方安奉養今塞徼清謐戎虜輯和中外峻良足備推擇敢祈宸造俯遂微衷特寢新除許仍舊任存煩眷聽敢逃罪責

謝賜手詔第二表

今月二十六日進奏院遞到賜臣詔書一道不許辭免秦州令依前命疾速赴任者天聽蓋高念微誠之難徹威光孔邇感慈旨之下頒有愧拜嘉尚祈得請中伏念臣材資至下地望尤寒幸遭熙辰久塵清貫出當方面曾風迹以無聞入總計圖顧事功之不立頃分留鑰獲養私庭未易歲筭遽遷



邊閫中臺喉舌之重西藩斧戟之雄朝寄非輕寵  
光甚渥在王臣之義况無難而可辭但人子之心  
幸奉親之為便爰罄由衷之請願終奉計之期荐  
叩公車再窺方面垂矜危懼未寘嚴誅此蓋尊號  
皇帝陛下舜孝格天堯仁被世君使臣以禮允昭  
德教之隆臣承命為恭其俟典刑之及竊惟覆照  
俯逮幽微遂愚志於一夫致懽心於萬國

辭免第三狀

右臣昨蒙聖恩除工部尚書知秦州以父老患脚  
膝難以迎侍遠行再具奏陳乞滿今任今月二十  
六日復奉詔勅不許辭免令依前命疾速赴任臣  
已具表稱謝外竊惟愚誠有所未盡上煩聰聽遂  
至再三干黷天威分當嚴憲朝廷不以臣才下付  
之方面加寵而行齒髮尚壯稍任劇使奚事顧憚  
妾為避免但以父年高末弱不堪乘騎須至遠冒  
炎暑輦而就道風氣有隙或以愆和由臣貪冒恩  
榮虧玷風教聖仁孝治及人之老區區危懼敢祈  
矜亮今月二十五日趙槩已到本府交割公事管



旬徐濟州並係京東去南京不遠迎侍便近伏望  
聖慈就移一郡少安孤拙臣見在本府祇聽朝旨  
君命至重詔勅再降臣不即祇受自速典刑不任  
戰越待罪之至

謝賜手詔第三表

今月十五日進奏院遞到詔勅一道賜臣令依前  
降指揮發赴秦州本任者需章瀝懇屢于旒宸之  
嚴溫詔遣行荐被絲綸之寵拜嘉優重積慮兢惶  
中謝伏念臣向奉制函亟更蕃榮文昌八座進陟卿

聯隴坻一隅俾專閫制退惟親便屢以誠陳願回  
渙汗之恩少適猶孩之養愚衷所冀宸鑒未俞稽  
留尺一之書合從吏訊繼捧十行之札仍促駕行  
祇覲襄章實增厚愧此蓋尊號皇帝陛下照臨施  
普覆載均休遠徼一物之遺慎擇四方之守眷存  
孤舊預在選掄示以大方采其微効仰令睿訓俯  
極覲顏况惟瀆之煩寔有再思之懼敢不恪趨官  
守躬布詔條揭節戒徒指西州而即路瞻雲結戀  
望北闕以馳誠



上殿辭免劄子

臣近自應天府就移知秦州以父年老患脚膝難以  
以迎侍遠行乞賜停寢詔旨不俞天聽蓋高君命  
至重不敢煩黷祇受告勅今蒙恩朝見獲面天顏  
敢瀝危衷猶希矜亮秦州於邊鎮尤為雄劇朝廷  
擇守委任非輕况今疆瑣晏清顧臣齒髮猶壯猥  
承寵寄何事懇辭但義有未安誠當聞列臣皇祐  
五年曾差知此州是時已為迎侍不便嘗所控陳  
昨罷三司知應天府亦緣便親得請今陛下方以  
仁孝治天下臣子於奉養之私莫不得所願臣若  
貪冒恩榮事親不盡奚待典刑之及故於名教有  
虧仰冀天慈曲全拙守時與鄉便一郡徐毫濟州  
皆於南京為近烏烏之情儻得伸於茲日犬馬之  
力尚當効於他年干黷宸嚴分甘誅竄

秦州謝上表

昨奉勅命差充秦鳳路馬步軍都部署經略安撫  
使兼知秦州軍州已於今日二十七日到任署上  
訖者一都之會控制西陲兩使之符謬膺中選爰



此布條之始實深思職之憂

謝中

伏念臣起自孤平

表惟踈拙入朝荷橐蚤次於禁塗出守腰章屢當  
於方面任隆有責効薄未酬曩辭邦計之煩獲假  
留都之近迹依鄉國情展清闈方幸便安俄叨簡  
擢進除省座往殿奠門護改隴之師屯撫洮河之  
種落雖連牧之寄尤重顧晨昏之養難違因上達  
於懇誠屢煩紆於詔督曲形公議莫徇私懷驅暢  
輟以戒塗敢稽嚴旨奉安輿而至部幸慰慈顏此  
蓋尊號皇帝陛下愛物無私使人以舊恢天下之  
度何遠而不柔付閭外之權惟才而是用良慙菲  
陋曷稱旁求幸今邊警之晏然上體聖莫之共此  
敢不殫竭精慮詳求遠圖期刑政之得中副乾坤  
之平施內而丹闕乃心壹誠

乞罷禁林就閑曹劄子

臣祇奉聖恩召還辭禁臣久患眼疾僅二十年舊  
學廢忘無以備顧問素業荒踈無以應時用若復  
典司制命自揆不堪供職又臣父年八十有二近  
在徐州臥疾半年至今右手乏力臂指不相為用



今當更直省內家無兼侍之人早昏緩急敢安愚  
慮臣受命之日即欲自言孤遠之情難期察允故  
待到闕幸對天顏上謝宸慈採擢之賜俯陳微衷  
深切之懇所祇覆育曲賜矜容俾就閑曹獲全拙  
守候近郡有闕乞別就一差遣奉法循理少分憂  
寄臣不任荷恩待罪激切之至

免起復除叅知政事第一表

今月某日試祕書省校書郎充睦親廣親北宅小  
學教授蔡天申齎到詔書一道授臣起復前官赴

闕者三年之制天下之達喪終身之憂人倫之大

義承恩命之至重在情禮而匪安中伏念臣早冒

寵榮父尸祿奉無事功之可紀積咎釁以為多蒙

聖神之誤知假名器而虛授上辜天造莫効於涓

埃不意慈親遽罹於禍酷懷茲鉅痛豈異餘生使

傳忽臨朝恩特降舉權宜之故事爰進召以還朝

聞命哀迷撫心悸慄矧惟銜恤甫此逾時孑然一

身未復同生之戚敢有二事居然從利之為伏望

皇帝陛下隱惻上仁恫矜微志紬奪情之弊典推



致孝之永懷特寢天恩用敦本俗許畢倚廬之慕  
免累朕朝之明螻蟻之微儻獲終其所願犬馬之  
力期得盡於他時臣不勝號殞俟命激切之至其  
詔書不敢捧承謹令某人齎起闕於通進司投納  
兼奉表陳乞以聞

詔

勅某省所上表乞免起復恩命事具悉朕方獲天  
下之籍疇咨大臣以共天職以卿雋老茂德久鬱  
而未奮斷自朕志擢佐鼎軸將觀夫深謀祕議倖  
然起廟堂而澤四海未及踰月遽罹艱棘釋位而  
去已畢哭踊之期宜從墨襄還復舊府深謀祕議  
遂而卒其功烈此朕所以拱袂以遲卿之來耳所  
乞宜不允故茲詔示想宜知悉春寒卿比平安好  
遣書指不多及

第二表

今月某日某官再齎賜詔書一道授臣起復前官  
者哀誠激切未諒於清衷詔扎丁寧復申於明命  
憂惶失措悲哽莫勝重瀝懇情冀垂察允  
中臣聞謝



聖人制禮愚者企而及之君子篤親天下從而化  
矣顧軼生之無狀蔑介善以自名昔自弱微實勤  
力養終鮮兄弟素無田廬徒用弓遊以給晨昏之  
事暨叨官達遂蒙根業之榮息念孤單每懷喜懼  
數陳情而聞請求解職以便私頃復禁嚴寢違志  
願先臣年雖耄老氣本清和小爽起居之常未切  
憂危之慮昨承宣對垂諭選除仰奉德音已陳深  
懇逮明廷之贊授尚灑座以控辭聰聽不回天心  
具照誠荷及親之幸遽罹過隙之悲退守几筵甫  
更時序豈期宸眷猥降璽封承命不遑悼心自大  
上稽嚴旨敢盡苦辭伏望皇帝陛下大義愛人深  
恩恕物俾終祥禫以報劬勞則所守粗完免作亂  
常之首餘生未謝永酬錫類之仁墮涕摧心期於  
得請臣無任號訴激切之至其詔書不敢捧承謹  
因蔡天申齋還赴闕於通進司投納兼奉表陳乞  
以聞

詔

勅其省所再上表今月五日蔡天申齋到詔書授



臣起復前官伏望俾終祥禫以報劬勞其詔書不  
敢捧承謹因蔡天申齋還赴闕事具悉三年之喪  
雖天下之所通惟國家急賢則經制可以權奪而  
臣子順變故至恩亦以義斷卿嚮參柄用旋屬家  
艱既虛席以踰時宜抑情而復位已嘗敦諭當體  
至懷所乞宜不允故茲詔示想宜知悉春暄卿比  
平安好遣書指不多及

第三表

今月二日某官再齋賜詔書一道授臣起復前官

者朝命至嚴已辱再三之重私情所切期伸萬一  
之微哀迫靡遑矜從是幸

中謝

臣聞孔子曰人鮮有

能自致者其惟父母之喪乎故三年之制天下之  
達禮尊卑所同古今不變用紀人倫之厚茲為王  
化之本在國朝之制繇慶曆以還近自親賢外通  
文武悉優容於在疾申鉅創以盡情豈獨孤臣敢  
忘大義方聖神之獨化會傑俊以熙朝群材並施  
自成乎大厦一毛雖落誰謂乎無牛魯是庸虛奚  
為損益惟踐脩之常守乃補報之近規雖出下中



猶知企及敢作亂倫之首以傷則哲之明輒冒罪  
誅訖陳精懇伏望皇帝陛下天無私覆物有曲成  
溥推亭育之仁俯軫蓋高之聽上全王體下盡私  
恩儻前畢於祥除或幸存於視息則區區薄志獲  
伸永慕之懷穆穆清光猶有再瞻之望輿言哽塞  
實切憂惶臣無任號訴屏營之至其詔書不敢捧  
當謹因某人齎赴闕進納兼奉表陳乞以聞

隨第三表劄子

臣頃因進對仰奉德音以為君人之道當正紀律

審命今茲謂持重之要蓋禮煩則黷恩過則輕節  
以制度馭下之操術也祖宗朝臣僚表章之儀朝  
廷詔答之體公式所著舊典具存近歲以來頗逾  
故事或因勞舊特加異數後來何者遂必為例既  
無甄別徒紊憲綱至如兩府起復仁宗朝富弼以  
宰臣當國釋位服喪五降詔書竟許終制即是起  
復之命決不可復行至于吳奎召旨尤峻奎歷陳  
將相執喪近事亦蒙報允臣昨膺擢用曾未旬浹  
莫展絲毫之効遽罹荼毒之苦甫經時序三辱重



封銜哀抱愧容身靡所在臣之分恩典已過過此  
以徃恐非所謂正紀律審命令之深旨也臣已上  
表披瀝情懇伏望陛下天日光明委照萬物察臣  
薄守非有詭激寢罷後命以明等威早圖俊賢裨  
贊國論積精會神共熙庶績上以尊乎王體下以  
全於拙艱苦由餘息不勝願望謹具劄子以聞

樂全先生文集卷第二十八

樂全先生文集卷第二十九

表狀

許終喪制詔

勅某省所三上表并劄子乞免起復思命事具悉  
朕之疇咨四維之輔首用擢卿以陪幹王室未及  
庭謝以鉅劄釋位而去俾朕歉然思欲以墨線起  
卿於苴麻之次累辭痛切諭之而彌固記有之君  
子不奪喪朕奚敢違禮必欲奪入之憂乎夫喪致  
乎哀而止無所過毀以傷性也廟堂之論猶將待



鄉以參擇焉依所乞許終喪制故茲詔示想宜知  
悉春暄鄉比平安好遣書指不多及

謝許終喪表

今月拾伍日進奏院遞到詔書一道伏蒙聖恩以  
臣上表辭免起復特許終喪者哀懇怔忡數塵於  
睿覽俞音軟惻許畢於喪期追成命之已行遂私  
思之罔極危誠既達餘息再生中謝伏念臣起自  
單微久塵通顯國之厚祿早伸反哺之懷朝有滌  
階實荷流根之澤仰繫仁治獲報義方尚繇疎薄

之材上被聖神之選捧承綸命及見庭闈雖迫隙  
光備蒙贈典惟是稱情之制斯為致孝之終方伏  
聖廬遽聞詔檢輒稽留於嚴旨屢披瀝於血誠孰  
云在陰之微亦有聞天之感俯回英聽垂亮孤衷  
許循致事之常以盡免懷之慕丁寧細劄狗人欲  
以矜從荒疚餘生戴天恩而殞絕此蓋皇帝陛下  
遠存古道下厚時風本盛德以興仁擴寶慈之惻  
隱章明天義沛發溫俞謂墨經之非經著素冠之  
得禮賜周存沒施厚生成草芥寸心亦抱太陽炤



潢汙一勺期歸滄海之深畢命王家敢有遺力  
臣今月二十一日得應天府送到中書劄子一道  
奉聖旨特令依見任叅知政事請俸減半支給者  
臣聞以庸制祿自古為國之大經也設官分職量  
其功勤而賦之祿未有安坐而享之者臣執喪在  
廬無所事事承此恩旨義何可當况近時將相重  
位居喪而蒙恩給俸者辭免皆得請臣今所授中  
書劄子不敢捧承已封繳納中書

第二劄子

臣今月五日得應天府送到中書劄子一道以臣  
昨奉聖恩特令依見任叅知政事請俸減半支給  
具劄子辭免奉聖旨所乞不允者切以先王立制  
為邦大經位所以待才祿所以報功國之操柄於  
是乎在若其憂服之中已致官職之事而乃叨冒  
重恩蒙享厚祿內於情而不稱外於義而有傷雖  
甚鄙庸敢辱名教伏望天慈許循近例特從停寢  
少安愧懼



免知陳州降詔不允謝表

今月一日進奏院遞到詔書一道以臣免知陳州  
不允者攝迹閑司分從於病廢領麾便郡復被於  
詔除中謝伏念臣立節無竒文少近野為學荒略  
魯弗究於一家賦性闊疎顧靡堪於諸薦更臺閣  
之要久依戶牖之嚴上荷清衷俯知素守有愧珪  
璋之特迺蒙藻蔽之華海鳥暫馴虛設太牢之饗  
風簫忽過豈諧雅奏之和尋外補於輔藩遂引歸  
於舊里莫安末節遂以窮年且隣解紱之期忍被

遺簪之訪此蓋皇帝陛下乾坤均施耀魄並明謂  
嘗奉於清寧知頗由於忠厚綸言存錄璽劄敦行  
君命臣承敢忘於祇率政平訟理但愧於循良向  
日傾心望雲馳戀

陳州謝上表

奉勅差知陳州軍州事已於今月二十二日到任  
上訖太皞之墟蓋自上皇之世有媯之後爰聞盛  
德之封氣俗敦淳土宜何厚日畿神甸先承首善  
之流耆望宿勲茲迺均勞之地中謝伏念臣久叨



近列無所取才向出守於是邦實祇聞於面命俄  
嬰病恙遂解麾符司憲陪都粗安於拙分子蕃近  
輔愧荷於明恩此蓋皇帝陛下圓覆無私大明委  
照有守者則錫之福可器者必盡其工顧惟孤陋  
之微亦荷記存之及敢不上膺簡亮自力襄疲更  
礪鉛刀聊施於一割所憂駕乘難効於長驅進退  
怔忡罔知攸措

辭免宣徽使劄子

熙寧七年十二月

臣伏蒙聖恩除宣徽北院使檢校太保判應天府

宣徽近司地聯二府名器之重禮秩至崇臣才望  
非高器識殊陋恭聞明命不任戰越朝廷舊制自  
前任二府臣僚改宣徽使皆由寄任除授故於物  
議為允臣職叨秘殿位列六官祇膺渥典雖有前  
例但以昨由輔郡移守陪都本為便私又居近地  
異寄任之重非宣力之處虛冒榮祿誠為僥倖况  
臣昨求朝覲獲至京闕止望一登文陛仰對清光  
以上謝於眷懷敢切希於晉寵天明下燭宸造曲  
成特降綸言俾察近綴在臣自量豈遑安處敢陳



丹懇冒黷淵聰伏冀聖明俯垂察諒特回制命以  
全愚守

辭免宣徽使欲乞近京一郡劄子

臣伏蒙聖恩久奉朝請今幸遇同天節稱慶禮畢  
敢瀝懇誠上千天聽切以宣徽近司地重而無責  
非國重戚而以恩澤加優者未嘗徒處也臣向因  
移任過京覲對猥承寵命遂留供職素餐充位豈  
所違寧欲乞近京一郡稍便鄉閭粗安素守伏望  
聖慈特垂察允

辭免中太一宮使劄子

臣承閣門告報已降勅命差充中太一宮使臣近  
以奉朝備位而無所事故乞一郡以安愚分伏蒙  
聖慈更加重職愧尸素而有請被恩典而愈優虛  
冒寵光無施報稱切自省循豈違寧處所降勅命  
不敢祇受伏望據前所陳乞特賜施行

謝除中太一宮使表

伏奉勅命差充中太一宮使已赴本宮管勾訖十  
精天之貴神肇開靖館五鎮國之命祀舊啓靈祠

崇奉式嚴典司為重謬充使職上出宸恩

中謝伏

念臣仕適逢時材非濟務智用同乎短絆不可以  
汲深切實譬之拔揚無得而成大昨領別都之鑰  
許覲中天之廷祇荷明恩俾陞近綴既久陪於朝  
著輒于請於郡章復膺溫檢之榮兼領殊庭之重  
披誠封奏申錫詔音嘉命是承危幪增暢此蓋皇  
帝陛下惠深涵養仁浹施生猥加體貌之隆奚取  
典刑之舊衰癘之質極蒲柳之望秋云補之心猶  
螢燭之嚮日念言謝事近在踰年敢希止足之風  
庶免婆婆之事實惟素志敢昧大明

免中太一宮使乞外任劄子

臣竊惟人臣立朝出處固有常分苟失其節必貽  
悔咎人君之所以厚遇其下非但優之以祿位而  
已亦在察其志之所存使處得其所斯可以為厚  
矣臣早際聖明特蒙察舉採諸群議之外擢于執  
政之末罷而外補優以閑曹甫及二年復除便郡  
每垂記錄皆出淵衷昨自陳州就移應天府自念  
衰晚前迫引年若便道以之官望清光而無日故



因過闕請來朝見止一謝於眷懷敢切希於寵利  
本期旬浹即望辭行陛下特軫慈衷俯矜舊物發  
於中旨處之近司曲示敦留俾奉朝請日趨嚴陛  
俄僅半年昨逢誕慶之辰已畢奉觴之禮故求一  
郡冀安素守今蒙聖恩更加宮使名秩增重優幸  
尤多今陛下厲精庶政自朝至于日中吳不遑暇  
食中外事無小大靡不經於神慮觀游娛宴未嘗  
留情輔臣百司莫不夙夜豈容浮冗獨無所事于  
其間以一介孤遠之蹤席貴戚恩澤之地取譏清  
議上累公朝是敢虔瀝懇誠仰塵聰聽欲乞近南  
京一郡退養衰疲則是宸造曲成慈眷尤厚始終  
保全實繫洪覆曷黷天威仰祈察允

辭免判永興軍劄子

臣自忝近司奉朝供職日趨嚴陛俄僅半年昨逢  
誕慶之辰已畢奉觴之禮故求補外退安素守數  
傾情懇未奉俞音今承差知永興軍須至復有干  
黷伏以永興大藩寄委為重但臣行將七十筋力  
殫疲目昏耳鳴精神內竭比及謝事纔餘半年今



去鄉閭程途頗遠虛煩吏民迎新送故伏冀聖慈  
檢會臣前奏乞改京東一郡顧茲衰暮得近松楸  
致仕之日歸田為便敢冀慈衷垂憫宸造曲成保  
全之恩始終大幸上冒天威仰祈察允

再陳乞外任劄子

臣早遇聖明特承眷獎昨因朝覲處之近職仰依  
洪覆實為優倖然臣年齒遲暮志氣衰索資本疎  
拙無所取材處則莫施補報之勤出則不堪煩重  
之寄而一介之守粗安常分上不敢為詭潔之操  
下不敢為貪冒之行故求徐克一郡所冀漸就田  
廬薦瀝懇誠未蒙察允伏望天慈俯矜愚朴特推  
保息之仁獲遂首丘之願干黷聰聽臣無任哀祈  
激切之至

再陳乞外任劄子

臣陳乞外任方在私第俟命伏蒙聖恩宣召令奉  
朝供職臣不避嚴誅湏至再陳誠懇念臣齒髮遲  
暮志氣衰索累求一郡退安拙守干黷天聰未蒙  
委照雖進退之禮慈衷曲示於眷懷而出處之方



愚臣宜有以自處伏望聖明俯加矜察特允前乞  
以畢私幸臣無任祈天俟命戰越激切之至

乞致仕第一表

臣聞事君主於無隱誠必自通陳力至於不能勢  
宜知止輒露引年之懇仰干從欲之仁中謝伏念  
臣親際盛明蚤塵華顯文章不足以潤色才業有  
媿於經綸歷事三朝殆通四紀內之清塗嚴闥極  
侍從之榮外之名城大都徧藩守之選之嘉猷以  
告于后無膏澤以下于民徒以朴忠愚直之心資

不能改至於利害得失之際初不自謀緣茲逼被  
於聖知嘗亦與聞於國論士儒至此幸遇已多比  
奉對於清閒每自陳於衰拙保留宮之鑰坐安喬  
木之邦惟饗顧良時忽焉而如失年齡浸邁疾疔  
交乘神明潰虛難支於外慮筋骸摧苾頓異於前  
時榮敢尚貪福知己過非獨招滿盈之禍懼將累  
覆燾之恩迫此憂危期於引謝伏望皇帝陛下曲  
矜舊物深燭至誠貸其無補於消塵哀此已疲之  
犬馬許上還於冠紱俾退養於立園順服生經儻

保完於餘喘願陪鄉老永歌誦於太平上以成君  
父始終之仁下以全臣子進退之節伏乞聖慈特  
許臣致仕

敕某省所上表陳乞致仕事具悉中外老成朝廷倚而為重始終厚遇人臣互不可輕鄉寵光進躡於疑丞禮貌兼隆於德齒比擇留都之優近仍從故里之便安胡亟上於封章願請還於印紱徒事恬冲之舉殊違眷異之懷所乞宜不允故茲詔示

想宜知悉秋冷鄉比平安好遣書指不多及

第二表

近者輒具奏封乞從致仕伏承溫詔未賜俞音懼汗莫勝危誠難止  
中謝伏念臣材資極陋身世至孤夤緣明主之知簡拔衆人之上功勤何有祿位過盈雖存主室之心死然後已而徇公家之事老矣無能尚被優容復叨居守厲衰殘而矍鑠不免曠官懷寵遇而留連又將滿歲災釁時作罷癘日增念治世之難遭抑重恩之未報迫茲頽朽無以



勉疆况今時不乏人人得其所自惟進退何繫重  
輕捧細劄之丁寧益孤衷之感涕朝經所著惟禮  
分之有常天聽蓋高異精誠之可徹伏惟皇帝陛  
下天無私覆物遂其生俯推保息之慈特軫矜從  
之造幸全拙守俾佚餘年既以免鍾鳴不止之譏  
又以脫器滿則傾之禍咏陶樂聖恬漠終身雖在  
林丘之微不忘君父之賜

詔

勅某省所再上表陳乞致仕事具悉卿歷事三朝  
嘗更二府頃授宣猷之秩往司居守之權方委才  
明坐分憂寄忽屢陳於封奏祈上致於官榮曰老  
而傳雖年耆之常制若不得謝亦禮典之舊章宜  
體悉於眷懷勿堅求於冲退所乞宜不允故茲詔  
示想宜知悉冬寒卿比平好遣書指不及多

第三表

伏奉詔勅以臣近上第二表陳乞致仕所請不允  
者恩由特旨禮過舊章恭被訓詞倍深感愧在念  
舊之仁既厚顧籲天之願未從敢瀝肺膺再干  
黃主

續中謝伏念臣蚤緣一介獲事三朝濫沐恩榮祇緣  
幸遇積歲時而徒久曾報稱之茂聞比陪近綴之  
嚴每慮素餐之誚間因燕見屢嘗懇激於引年度  
奉德音乃復逡巡而就次出司留鑰又浹歲筭桑  
榆之光徒引高原之望犬馬之力豈堪長路之馳  
雖復勉強良難振起故傾丹悃以乞殘骸敢謂聖  
度寬大而曲容拙疎天眷怛惻而尚加撫遇切念  
事君之禮雖以承命而為恭然其陳力有期至於  
不能而則止冀全微守仰答深仁謹復盡辭庶希  
得謝伏望皇帝陛下廓日月之照而幽無不燭推  
天地之造而物皆遂生許上麾符俾安田里黃髮  
倪齒退從鄉社之游文陛赤墀徒望天衢之遠逶  
迤末路誦咏昌辰茲惟君父之慈豈特丘山之重

詔

勅某省所三上表陳乞致仕事具悉卿位居法從  
歷年滋多職踐政途宣力尤至此從近列出領別  
都方繫鎮靜之才坐委居留之任奚屢陳於封奏  
祈自解於事權朕注懷老成優眷舊德宜體待賢



之禮少捐知止之懷勉安爾官無拂子命所乞宜  
不允故茲詔示想宜知悉冬寒卿比平安好遣書  
指不多及

乞致仕劄子

臣昨者上章陳乞致仕伏蒙聖恩降賜詔書不允  
固合上稟德音姑安分守然義不獲已理難苟安  
臣自念荒疎久塵近列犬馬之年七十有一本期  
過同天節方伸前請涉春以來舊所患眼疾頻發  
昏痛至于簷押案牘披覽辭訟每委僚佐一面發  
遣事屬妨闕切不自遑而又心氣虛煩動多遺忘  
深惟此疾非旦夕可愈雖欲強勉難以遷延仰祈  
天慈俯垂矜念前未得謝已為恩禮之隆今復自  
陳可諒懇誠之至伏乞朝廷檢會前後奏請特許  
致仕上荷大君之德下從鄉老之游樂聖安時以  
全素履

乞致仕第二劄子

臣近奏乞致仕准中書劄子奉聖旨所乞不允臣  
資養愚然切嘗聞事君之道矣蓋君猶天也天可

欺歟人之悖德敢於欺天而後忍於欺君也臣雖  
不令不敢以忠信自期然一介之守亦粗有所存  
矣當有聞於天聽敢不以誠者哉臣自熙寧三年  
赴任陳州於路得疾面目偏急後醫治雖痊捐然  
終不復舊至今語謇澁心多悖易忘時昏眩故向  
者在朝因對屢常面求謝退夫隆名重祿是人之  
所欲臣非事詭激獨異於人蓋自度不任恐無益  
於國以上累於聖知此實深情所在自到南京又  
一年半精力寢衰惟自知覺加之目痛心氣虛煩  
其於公事實多妨闕以臣素好道養故外若可觀  
然實無功效譬之土木偶其中朽矣故事曾處近  
司而乞致仕者章再上而得請臣已四請而不允  
天恩可謂隆厚矣今者不避誅殛復上干於宸扆  
言出肝鬲非有飾辭游說大明在上無幽不燭覆  
育之下生物咸遂况臣孤拙夙被慈眷今茲微懇  
可無感徹伏乞特開恩旨許令致仕仰冀曲成之  
賜俾蒙保息之仁荷天之休以終暮齒

辭免東太一宮使劄子



臣伏奉勅命就差充東太一宮使許於南京居住者臣昨乞致仕累黷天威今蒙聖恩更授官使列在近班處之真館上承渥眷以感以懼然於愚衷有不安者又須再披誠懇仰冒宸聰臣猶自以為煩然於義不獲已切惟陛下勵精庶政惟日孜孜臨聽至于中吳程書建乎乙夜弼臣近司陟降勤恪百工群吏各有官責臣在朝無補於國何勞自以年齒衰暮氣力疲乏故乞殘體以避能者天高聽卑得請為幸今乃以重職而家居享厚祿而閑

佚臣切安此物議謂何伏望陛下正王制名實之體成臣子進退之宜特許致仕是臣本志儻過辱優禮未容謝退乞特還舊秩領一閑曹雖愧備負之冗庶寬浮食之慙上足以昭示恩慈下可以少安分守仰依天日得引歲華覆照之下容處容處

謝東太一宮使

昨者陳乞致仕伏承勅命就差充東太一宮使許於南京居住尋再伸前懇或乞還舊官今奉詔書不允者欲致為臣蓋衰齡之所迫恩不得謝尚舊



物之未遺止解鑰於留宮猶備負於真館忝冒滋甚兢悸靡遑謝中伏念臣本自寒生曾微遠用雖薄聞於大道亦粗守於孤忠其實蠢愚誤被三朝之所獎至於報効殆無一事之可言惟寵利人情之所懷惟聖明仕者之難遇自念支離之久且多饕冒之慙庶耻之思豈獨畏清議而已滿盈之戒實亦有私意在焉屢剴悃誠決期引謝天慈過厚鄙志莫伸尚聯微省之班仍玷殊庭之職官責之所不及人事之所至安衆共稱榮臣實知懼念籲天之屢瀆姑就次以為恭俯仰深惟捐糜曷稱此蓋皇帝陛下道周謨典化格範圍取人以身盡物之性九德以之咸事四維於焉並施臣敢不歌福祿以崇君親因榮幸以循名節庶完終始無累生成

再陳乞致仕表

七十致仕禮有常經再三上言情非虛飾謝中伏念臣早塵顯仕才本空疎薦歷要塗事無稱紀幸遭寶國之肇啓預聞玉几之道揚首承日月之光先沾河海之潤特蒙褒舉迥出等夷虛被寵靈訖微



報稱久從外補遂迫頽齡致章紱以上還丐筋骸  
而歸盡陛下矜憐庸朽寬屈典常加使領於祠宮  
俾便安於鄉社臣感戀德澤難於固辭留連哀遲  
體此深養坐糜厚祿行復二年誠恐一朝溝壑之  
虞遂成終身負乘之耻逮茲未老得以自陳伏惟  
皇帝陛下天施無私爰慈均篤出處之際旣曲盡  
於恩榮進退之間得粗全於名節屏伏閭里詠歌  
聖時行葦無牛羊之優蒲柳免風霜之患嚮用五  
福式彰皇極之隆國有四維少穆民風之厚

詔

省所上表陳乞致仕事具悉卿國之耆艾時資典  
刑內領祠宮外居里閭不嬰以事固足養安乃復  
抗章遂求解組徒欲遺於榮祿良未協於春懷雖  
知懇誠難徇來請所乞宜不允故茲詔示想宜知  
悉夏熟卿比平安好遣書指不多及

第二表

近上表乞致仕蒙聖恩降詔不允者切以大君保  
息之慈人之老者疾者得所養治國經常之制士



之進者退者惟其宜不堪陳力之勞爰上乞骸之  
請詔函下降天旨未俞中謝臣聞委質大方前經明  
訓自古不得謝者在禮雖或有之然皆德業高賢  
功勳夙望邦家倚以為重中外賴之為安加恩所  
以特優被寵誠為無愧是以義全大體衆罔間言  
如臣徒以空疎早蒙東擢事猷弗逮報稱蔑施遽  
及衰疲遂求引罷而更濫當渥命遙領真祠位陪  
執政之班祿倍大夫之秩職憂靡預官責不加上  
紊彝章俯慙私倖敢循舊典謹復自陳伏惟皇帝  
陛下一氣均私大圓正冒匹夫自盡各伸所志之  
微萬物由庚皆受曲成之賜俯諒虔勤之懇特垂  
開可之恩精驚紫宸猶結望雲之戀迹還白社終  
懷樂聖之心

詔

省所再上表陳乞致仕事具悉卿逢時特起歷事  
三朝直諫多聞可謂成德比緣請外勉徇均勞旋  
解宮符遙莅祠館優游鄉社幾同佚老之歸輔養  
天和何待潔身而去累章來上殊怫予聞姑體眷



懷務安厥位所乞宜不允故茲詔示想宜知悉夏  
熱卿北平安好遣書指不多及

第三表

臣昨再上表乞致仕伏蒙聖慈降賜詔書不允者  
章<sup>達</sup>前至誠上徹恩加望外再請未從願惟衰朽  
之年久切優安之地祇膺異數益不遑寧<sub>謝</sub>中臣聞  
事君之方本取精神之用行己之義當思名節之  
存壯而不勉則非忠老而不歸則忘耻今臣心力  
日耗耳目加昏謝事之期已逾三歲瞻天瀝懇蓋

亦累年且士之立朝古有垂訓四十曰強而仕七  
十曰老而傳非異稟之粹靈必同倫於荒耄坐糜  
重祿虛占近班偃息在床優游卒歲進退非據俯  
仰厚顏衆將謂何沒有遺恨伏惟皇帝陛下金玉  
百度紀綱四方元首股肱既熙萬事奔走先後各  
効所長在臣去留奚繫輕重蓋年及而引去人臣  
謂之令終禮得而許歸人君所以加惠仰希慈造  
濬發俞音國制坦明式遂區區之分王道正直益  
恢蕩蕩之風生成亭育之仁始卒保全之賜撫心



殞咽之死靡它

致仕告詞

勅凡內外群工許其謝事而去者咸進秩一等是於優賢秩老之義亦無所缺矣至耆艾大臣有顯勞成德而朕之所禮重刑非殊恩異數不足以稱朕意又可以常此言乎宣徽南院使光祿大夫檢校太傅上柱國清河郡開國公食邑五千八百戶食實封壹阡叁伯戶張某宿有重望歷服近班項在先朝職守禁從屬英考以朕為儲副而親聆德音實視詔草自解政柄久從便安而數奏引年懇上印紱乃命舊使以東宮二品就第對此光渥永介壽祺可特授依前檢校太傅太子少師充宣徽南院使致仕散官勲封食實封如故仍放朝謝

謝致仕表

今月二十三日左班殿直郭安仁齎賜勅告各壹道伏奉聖恩授臣太子少師依舊宣徽南院使致仕者引年謝事錫命自天以徽省之近司加儲闡之崇品祇承詔檢榮觀綸綍之舜知自宸衷曲被

寵光之渥蒙恩至厚震魄無容謝中伏念臣器慮迂  
踈材資淺薄踐揚通顯叨愈四紀之長陟降光明  
忝覩三朝之盛聖神續御邦國惟新屬當訪落之  
辰濫預其難之舉遽罹家釁越去朝班因違戶牖  
之嚴薦易褫幾之守遂嬰犬馬之疾寢迫桑榆之  
期上列奏封蓋謹循於禮典俯頒細札爰深示於  
眷懷特授祠宮俾安鄉社又仍歲律當復自陳祇  
荷天慈獲從私志臣子再三之黷顧不容誅君父  
覆載之恩孰與為大此蓋皇帝陛下至慈鞠育大  
德生成始終為之保全進退免其咎悔簪履敝物  
猶矜惻於棄遺名器至公用顯章於優異但自嗟  
於衰暮訖莫報於鴻私共戴一天均在照臨之下  
同居萬彙豈離造化之中

免宣徽使表

今月十五日進奏院遞到告壹道伏蒙聖恩授臣  
宣徽南院使檢校太傅依前太子太保致仕降命  
自天恍日星之下燭跼身無地凜淵谷而若驚恩  
出殊常義難虛授謝中伏念臣器資本薄材用無長



時幸遭於昌辰仕早塵於近綴薦揚中外曾罔著  
於事功孤立朝廷寔粗循於分守頃引年而得謝  
蓋倦飛而知還退處田廬遂經歲籥仰聖神之並  
化揭日月以合明豈期綸綍之光忽及衡茅之下  
徊徨自失愧惕交懷此蓋皇帝陛下大德施生至  
仁丕冒播九功而惟叙致萬物於由儀一氣發春  
槁木成於萌孽大雲布雨涸澤接於潢污顧茲耄  
殘亦霑亭育然再念臣名除班籍跡遠闕廷事匪  
違寧理當自列慈衷圖舊廼盛王之所行小節不  
踰亦匹夫之為諒曲頒寵渥曷敢欽承伏冀寢停  
庶安微陋

第二表

伏蒙降到詔勅一道以臣辭免恩命不允者天鑒  
蓋高微誠未徹王言作命諄誨如聞夫何踈外之  
蹤亦預僉俞之議數斯上黷但積戰兢謝中伏以宣  
徽兩院之名廁於執政二府之重職業無實班秩  
甚崇中間廢停蓋緣官制今茲復置以待賢勞豈  
謂龍光遽加散冗惟朝恩之誤及豈愚分之所堪

此蓋皇帝陛下百度允脩九德咸事大中之福用  
敷錫於庶民不宰之功以曲成於萬物如臣者忝  
塵最久倖會居多及茲大耋之年安然泰寧之世  
織埃無補於國一毫罔造於民敢於草莽之中自  
稱簪履之舊乃今瀝懇而有請猶是為身而圖全  
仰冀高明特垂矜察典刑大法不虧立政之方名  
器至公免累假人之慎特回寵渥昭示邦彝

第三表

伏蒙聖慈以臣辭免恩命再降詔書不允臣聞慎

出令者邦國之憲章知守節者士人之義分難避  
聰明之黷瀝陳肝膽之誠中切以舊置宣猷秩均

近輔比還使職蓋待材勞詔旨經年除書未再而  
臣頃緣衰老久遠朝班退伏田廬寢更歲曆無功  
德於平日徒安樂於聖時退省其私中切自幸深  
懼滿盈之戒粗安止足之懷豈渝率履之常上致  
假人之議伏望皇帝陛下天光下燭人欲不違察  
其孤秉矜其微志特頒眷旨回復悞恩使臣保犬  
馬之餘年全桑榆之頽景考終厥命無愧於心則



日月之輝天地之施生成之賜淪骨

謝免宣徽使劄子

臣伏奉詔書以臣三上表辭免恩命不允仍斷來章臣切以先王建官分職所以延俊又崇名重秩所以旌勞能此乃治世之具立國之基幹也本朝宣徽使無所任於事為待材用之宅中緣官制而罷既而復還其位蓋廟堂之議事存本末臣既退老多年雖曾經此職今則非復任用之人寵渥忽及自度虛授無名屢黷聖聽不敢承命三代之盛王未有遺年者歷世明君優恤耆艾以為令典恭惟二聖德義出於此然人臣之節一介之守區區孤陋亦有所志今夫盛王之事陛下既已行一介區區之守臣亦願終其履踐焉敢妄意苟得以干物論伏望天日高明特垂降鑒庶於朝廷大公之體粗有補於涓埃

謝免除宣徽使表

伏奉詔書以臣上劄子辭免恩命特蒙聖慈允所  
請者切以惟皇建極置器於安思福以發其光榮  
憲度以成其嚴重必使人而知分寔為國之大經  
故得俊民用章百揆時叙中伏念臣委質四朝之  
盛及今大耄之年罔著事功靡一毫而報上偶逃  
罪惡幸無忝於所生退處田廬倏歲紀豈意桑  
榆之末忽承天日之光命出殊常魂驚失措力陳  
危懇實內激於肺肝仰冒明威蓋自甘於斧鉞伏  
惟皇帝陛下至誠成物大德得人德義之興本出

民風之厚典刑所載良資王道之平豈唯孤陋之  
身可當謨訓之美

授太子太保謝表

伏奉今月某日告命授臣太子太保者成命已行  
義難辭避無功虛受愧溢面顏中伏念臣早依日  
月之光退迫桑榆之景杜門屏迹已安灰槁之餘  
送往事居無復分毫之効敢期新寵例及陳人此  
蓋伏遇皇帝陛下哲命初基舊章畢舉嘉與群賢  
之共治聿追列聖之貽謀雖零雨時風無所揀擇



於物而枯草腐木難報生成之恩

又

伏奉今月某日告命授臣太子太保者渙汗所均  
一新中外遞遷之澤例及衰殘謝中伏念臣歷事累  
朝叨塵二府少壯之日已不逮於衆人艱難之時  
又退安於末路有何功蹟冒此寵榮此蓋伏遇太  
皇太后陛下美他財成至仁涵育荷宗廟之重託  
極神人之歡心大覃曠世之恩求助嗣王之德而  
臣老病所迫報効無時惟當教忠於子孫庶幾無

負於天地

遺表

臣聞生也有涯况叨蒙之過分死之將至猶感戀  
以存懷輒鳴臨絕之音仰贖蓋高之聽中伏念臣  
立身孤介遭世休明早習藝文自託聖人之道粗  
持為守以近天子之光塵忝高華踐揚中外雖其  
經國之遠業無稱於時至於事君之大方敢愆於  
義鍾漏向盡田廬有安惟大期之既窮念鴻私之  
難報伏惟皇帝陛下體均洪覆神凝太清尊若北

辰乘璣衡而不動安如厚地容河海以成深時萬  
斯年如一之日自惟殘魄方永謝於明時獨此丹  
誠豈可埋於幽壤

免南郊陪祠表

伏奉詔勅令發來赴闕南郊陪位者郊廟親祠國  
家大事百辟咸在有懷舊臣明詔及門許陪盛禮  
顧衰體之疲朽承寵命以震驚謝中伏念臣頃荷天  
恩出司留鑰榮歸鄉國理極便安年迫桑榆義當  
休息飛章請老本慙賢路之妨不稼取禾更積素

餐之愧恐再三之上瀆終忝冒以不遑然而夙苦  
目病比頻發動近加末弱殆不支持方陛下咸秩  
百神駿奔萬國思以自天之福祿均畀在位之臣  
工惻然眷懷未忍遺棄而臣自顧殘癯之質恐成  
跛倚之尤身滯周南信榮觀之有命心游魏闕念  
入侍之為難惟當望柴燎之餘煙伏敞廬而切抃  
坐馳丹悃仰企清光媿墮之誅逃避無所  
臣伏被詔勅令發來赴闕南郊陪位已具表稱謝



及陳情懇附奏訖切念臣早以庸虛上塵眷遇昨  
知應天府引年謝事備瀝危悃仰蒙宸恩就除宮  
使切祿自便每不自違退就私居纔逾時月天慈  
記錄又加特召愧甚失措感深殞泣誠願榮陪盛  
禮因得一覩清光此時不入國門便是永填溝壑  
但臣夙患目疾每發良苦近因退閑方專治療攝  
心收視冀復精明仍自夏秋足膝少力雖不妨行  
步而難為久立儻若可趨班著固當不俟駕行今  
此阻難彌用悼恨望雲極日向日傾心形骸徒存  
神爽飛越敢披愚鄙上達聖聰謂天蓋高矜此躅  
躅謝免南郊陪祠表  
伏奉詔書許臣免赴南郊陪祠者天眷優隆不遺  
舊物老身衰病辜奉明恩未即譴尤重加慰諭中  
伏惟皇帝陛下奉若天地祇事祖宗罄萬國之歡  
心洽百禮而為奉四海來格尚何有於匹夫誠意  
旁周獨未忘於一介其為幸會上出眷懷况臣仕  
歷三朝班聯二府固合勉強筋骸之力奔走邊豆



之間聽上祝之告休均在廷之率舞顧以迫於罷  
曳豈敢苟於便安始効私誠謂嚴誅之莫寔重遷  
細扎識聖度之兼容雖蒲柳之質旣衰而葵藿之  
心未已瞻望殞越寢興不遑

免南郊陪位表

伏奉詔勅令發來赴闕南郊陪位者國之大事禮  
行于郊在位群工肅祭容之嚴翼有懷舊老仰天  
眷之優隆顧疲朽之殘軀惟震驚於寵命謝中伏念  
臣久安鄉社已迫桑榆雖優佚於盛時日侵尋於

衰病日病增眊但馳想於闕庭末弱難支實艱趨  
於壇壝方陛下恭承圭幣嘉薦豆籩四方駿奔萬  
福來下欲其敷錫弗忍遐遺而臣自顧疴瘥之姿  
恐成跛倚之失侍祠拱帝難參會弁之星抱瘵卧  
廬徒望升煙之燎坐馳丹悃仰企清光掄墮之誅  
逃避無所福自非然亦臣自願疴瘥之姿  
賀南郊禮畢表萬靈歡林惠新  
伏見今月貳拾柒日南郊禮畢大赦天下者惟聖  
為能饗帝莫大於卜郊好生之德洽民茲為之大



德中謝臣聞天地萬物之始祖宗百世之先書有肆

類之文禮著嚴配之義曠三年而後舉周四海以  
薦誠然後精意獲通萬靈咸秩惠澤迄於列辟賜  
予均於六師自非熙辰曷脩盛節伏惟皇帝陛下  
仁孝昭格叡知躋克享天心以作神主故能普安  
寧於外表効職貢於殊方釐事告成舊章益懋臣  
忝逢明代獲綴近班觀陟降之多儀阻陪祠位被  
龐鴻之純嘏徒仰天光遙望闕廷實深慶抃

奏謝加恩表

元祀告成鴻恩溥及雖在退藏之品猶加異數之

榮祇奉絲綸實增慙懼中謝伏惟皇帝陛下竭誠致

饗受祿自天樂與群臣同霑大慶上自股肱之列

下周筮庫之微嘉其顯相之勤錄其駁奔之助霑

然大賚夫豈無名如臣草木餘生桑榆暮景顧田

廬而願遊竊秩祿以常驚多病支離已無任於陪

祀寵光沾洽尚不問於推恩荷德滋深論報無所

莫重免明堂陪位表

今月二十三日伏奉詔勅以明堂大禮令發來赴



闕陪位者伏以大饗之禮蓋崇於宗祀至孝之誠  
莫重於嚴配盛節斯舉惟聖為能既備闡於典章  
尚不遺於耆老中伏念臣退歸鄉社久遠禁塗雖  
優佚於明時日侵尋於衰病目痾增眊但馳想於  
闕庭末弱難支實艱趨於軒陛伏惟皇帝陛下恭  
承正弊嘉薦豆籩四方駿奔萬福來下欲其敷錫  
弗忍遐遺而臣自顧尪癯之姿恐成跛倚之失侍  
祠拱帝難參會弁之星抱瘵卧廬徒望升煙之燎  
坐馳丹悃仰企清光偷墮之誅逃避無所無幾之

伏奉今月二十三日詔勅以明堂大禮令發來赴  
闕陪位者國家大事祀典為先况茲饗帝之嚴實  
舉配天之禮百辟咸在有懷舊臣明詔及門許觀  
盛節顧殘骸之疲朽承寵命以震驚中伏念臣早  
荷朝恩老歸鄉社坐靡廩祿無益涓埃夙苦目痾  
比頻發動近加末弱迨不支持伏惟太皇太后陛  
下咸秩百神駿奔萬國思以自天之福下均率土  
之濱惻然眷懷未忍遺棄而臣自顧尪癯之質恐



乖恭肅之儀身滯周南願瞻卬而莫及心游魏闕  
念入侍之為艱敢冀宸慈特垂矜允上虛明命難  
違嚴誅傳一吐木然並不文赫火卦六五

免明堂陪位表

伏奉詔書以明堂大禮令赴闕陪位者明德惟馨  
方格神於盛禮相子肆祀猥賜召於老臣衰朽知  
榮兢惶靡措謝中伏惟皇帝陛下嗣隆聖統躬致太  
平翼翼文王之小心烝烝虞舜之大孝季秋順序  
方萬物之盛多四方和來嘉多士之奔走祇見列

聖衷對昊穹敬布政之法宮大明禮樂受丕天之  
景貺均被邇遐喜交神人慶浹夷夏允執事豆籩  
之末或觀光輿隸之間足為至榮可以無恨而况  
臣早以屏退尚叨記存溫詔在門外庭有位固願  
聞舜韶而率舞瞻堯日以傾心遲暮之餘衰疲且  
久當千歲之接統自滯周南奉半夜之受釐莫趨  
宣室無階策勵惟劇飛馳聖詔不復

合宮備禮方歲事於季秋列位侍祠尚不遺於故



老仰恩榮之優異循衰瘵以戰兢伏惟太皇太后  
陛下聰明自天博厚載物左右景命固大濟于艱  
難保育神孫既聿躋于齊聖邦家康靖朝野肅清  
頌德告功既對天而不忤隆禮備樂念報本之惟  
時當魚麗之世而物既盛多由思齊之聖而神用  
昭格擁純禧於二聖肆大賚於萬方曠古上儀于  
今盛典臣久辭屏著退伏里閭覩聲明于垂盡之  
年受德澤於惟新之政顧餘齡之已幸矧溫詔之  
見臨是宜策勵造廷齊明就列與其失周士在廟  
之敬不若同克民擊壤而歌文物莫瞻夢有鈞天  
之想精誠未已心為魏闕之遊

謝男某差遣表

命行予奪之間茲為君柄事守章程之細則有司  
存凡出殊恩謂非常制不有宜稱是虛寵靈謝中伏  
念臣早遇聖明嘗蒙親近仰承眷遇實有異於等  
倫自念衰殘顧難當於注意幸分符鑰因就田廬  
歿歸狐首之丘生奉豚肩之祀上託至仁之化遂  
忘大耋之嗟猶舐犢以嬰懷爰拂龜而有請輒干



明格方待嚴誅伏惟皇帝陛下治用孝慈德隆穹  
厚不期舊物仍記於堯心豈謂塵容尚存於舜目  
淵衷矜惻特旨可從宸造屬於老臣私便及於愚  
息九天降澤滂霈接於源流一氣發春榮潤均於  
根葉莫伸報塞但積愧惶葵藿至微徒有心於向  
日潢汙且涸固無路以朝宗想望闕廷飛越精爽

薦龔懋應詔表

伏聞人主大柄在手攬髦俊人臣大節在乎建功  
名况當有為之時尤急非常之士伏見應茂材異  
等科龔懋研究歷代之故通習諸家之說村略可  
使從政智筭可與慮事向嘗應詔再召延閣有司  
所病不及大對羈旅益困操守無虧今邊略未寧  
謀能為急有如懋者士林之擇如使在野茲為遺  
賢臣今舉其人堪參謀帷幄之舉如家甄錄試任  
無効臣其准詔書連坐之罪

代人自外郡除待制表

范文正公

今日日遽到官告一道蒙見授前件官者省署清  
曹禁廷近職忽外除於散地知上出於震衷

中伏謝

念臣藐爾孤生邁茲盛世竊慕匹夫之諒誓守平生之心暨忝列於冠裳每感激乎忠義頃值陛下躬親聽斷始初清明登用俊良旁逮踈賤擢從郡倅陞列諫垣誓輸肝腸以報恩遇有聞無隱盡葛藟之鄙言淺智深謀昧朝廷之大體寬恩外補支郡假麾未易炎涼遽遷會劇歲水潦之為敗民力食以方艱求寬常租議導壅水陳章請而煩復輒恩旨而可從眷澤周隆編氓蘇息在臣愚劣何術保綏風宵勉勤曠敗是懼豈謂江湖之上遠蒙日月之光詔命忽臨寵名非次大邦多士清朝富才上秉帝心豈少臣比感深泣下愧甚魂驚此蓋陛下仁及隱微德施溥博虛懷小善來天下之魁英借寵狐臣勵朝端之風節揆能不敏恩報何階惟當白首初心黃泉一節仁愚反哺庶堅鳥鵲之心義不逃生無惜螳螂之臂



奏狀

臣等聞先帝陛下聖德日新

道遠日修

臣等聞先帝陛下聖德日新

道遠日修

臣等聞先帝陛下聖德日新

樂全先生文集卷第三十

奏狀

遷禮部侍郎知滑州舉官自代

右臣蒙恩除尚書禮部侍郎准勅節文舉官自代

者竊見翰林學士尚書刑部郎中曾公亮端良清

慎守道有文爰自立朝搢紳推重使登省闈實煥

儀曹乞回茂恩庶允公論

服除再授端明殿學士兼龍圖閣學士給事

中舉官自代狀

奏狀

臣等竊見翰林學士尚書刑部郎中曾公亮端良清

慎守道有文爰自立朝搢紳推重使登省闈實煥

儀曹乞回茂恩庶允公論

服除再授端明殿學士兼龍圖閣學士給事

中舉官自代狀

樂全先生文集卷第三十

奏狀

右臣蒙恩除尚書禮部侍郎准勅節文舉官自代

者竊見翰林學士尚書刑部郎中曾公亮端良清

慎守道有文爰自立朝搢紳推重使登省闈實煥

儀曹乞回茂恩庶允公論

服除再授端明殿學士兼龍圖閣學士給事

中舉官自代狀

中舉官自代狀



右臣蒙恩除前件官職准勅節文舉官自代者臣竊見翰林侍讀學士尚書右司郎中錢明逸業履端修學識該敏施於有政議者曰才盍處深嚴上資訪對代臣充職實允僉言

除知制誥舉官自代狀

右臣蒙恩除前件職准勅節文舉官自代者臣竊見尚書屯田員外郎集賢校理充天章閣侍講曾公亮藝文該洽業履清純綽為儒館之英早預經筵之選臣猥繇注筆叨踐綸闈較之若人實為誤

進願回恩典庶協僉言

除翰林學士舉官自代狀

右臣伏蒙聖恩特授前件職准勅節文舉官自代臣伏見右正言知制誥楊察器識優長藝文通敏早陪法從再掌命書宜被召於浴門以增筆於禁署臣之孤陋懼玷詳延願回寵章庶厭公議

除知諫院舉官自代

臣伏蒙聖恩擢居諫職退省才分夙宵愧畏竊見尚書度支郎中直集賢院知泰州王質淮南轉運

使尚書兵部負外郎劉夔皆器識方雅學術深正  
冲退處易安和有守使備獻替拾遺左右必能副  
清衷之虛佇勵風俗之貪競况質等名官年德遠  
出臣先儻以代臣實慙物議

除三司使舉官自代

臣伏蒙恩授前件官准勅節文舉官自代伏以貨  
食者國務之重農商者民業所存平准之權通利  
之術領茲大計屬在長材竊見端明殿學士兼翰  
林侍讀學士尚書吏部侍郎宋祁器蘊閎深業履

端厚文登近列綽有遠猷俾之治財必濟輕重願  
推渥命庶允朝僉

舉李大臨蘇軾充諫官

臣某准愬寧三年六月二十七日中書劄子奏聖  
旨諫院闕官令於朝官內舉二人聞奏者  
右某伏見尚書刑部郎中李大臨識蘊純深風局  
冲遠殿中丞直史館蘇軾文學通博議論精正其  
李大臨雖曾任知制誥見係散郎官在常叅此二  
員並堪充諫官不如所舉臣甘同坐



舉戚舜賓館閣檢討

伏以美教化厚風俗王道之本也欲教化之美風俗之厚在乎進廉節敦朴之士焉臣等區區竊志于此伏見尚書司勳員外郎同判刑部戚舜賓奕世名儒並見史牒孝悌著於家行義稱於鄉該涉藝文留心經術自祥符初被詔管勾應天府書院切摩誨誘諸生多至成就至今孜孜不倦昨任淮南提點刑獄屬朝議方操急郡縣為舜賓長者非搏擊吏罷之而令管勾國子監近改判刑部伏望

朝廷察其儒者老於庠序除一館閣檢討名目所謂廉節敦朴之士臣等切謂舜賓近之于冒宸嚴臣等無任戰懼之至謹具狀奏聞伏候勅旨慶曆三年尚書兵部員外郎知制誥臣趙槩右正言知制誥臣楊察翰林學士右正言知制誥充史館修撰臣張某翰林學士起居舍人知制誥臣孫抃翰林學士兼龍圖閣學士戶部郎中知制誥臣王堯

舉朱宋充館閣職名



臣等昨奉勅差赴祕閣考試制舉人等內有應賢良方正能直言極諫科國子監直講朱案所試六論考中第四等下據舊例閣試第四等下並預廷對止因景祐中年第四等人數稍多報罷之以此朱案承近例不得召試臣等看詳所試六論其文學理致亦深可觀采及錢明逸對策登科亦是第四等次物議於案頗稱遺才兼其人履行端確經術該明先著撰春秋指歸辨析三傳疑義辭旨精通有裨儒林之說臣等今取索到上件春秋指歸

一十二卷謹具進呈伏望聖慈俯回眷覽特賜召試置之館閣庶廣得人之路上副求賢之意候進止慶曆三年太常丞直集賢院同修起居注知諫院臣張某右正言知制誥臣楊察右正言知制誥臣吳育右諫議大夫權御史中丞臣賈昌朝劄子准勅舉省府推判官

准御史臺牒准勅節文委待制已上官各於館閣朝臣臺官提點刑獄知州內舉壹員充省府推判官者右謹具如前臣伏見祕書丞祕閣校理楊攷



以文學發身以材敏從政使之治劇必有可觀臣  
今保舉堪充省府推判官任使如擢用後犯正入  
已贓其當同罪如曠官失職不如舉狀亦其連坐

准勅舉提點刑獄朝臣

准勅令舉提點刑獄朝臣湏是曾任知州及實經  
兩任通判已上人充者右謹具如前臣伏見太常  
博士前知彭州令狐挺才用通敏臣今保舉本人  
堪充上件任使如在任犯正入已贓臣其同罪

准勅舉清要官

准御史臺牒准慶曆八年五月十四日勅於內外  
升朝官曾任通判成資已上人內有材識通明履  
行淳正堪任清要任使者各同罪保舉二名並湏  
歷任無公私過犯及不是兩府及自己親情方得  
奏舉或雖公罪杖已下情理輕者亦許論薦者右  
具如前今伏見太常博士范寬之甚有材識兼有  
操守係通判成資以上歷任無過犯不是兩府及  
臣親情今保舉堪充清要官

准勅舉可升擢任使文資官



准御史臺牒准勅保舉文資三員行實素著官政  
尤異可備升擢任使之人仍於舉狀內明具本官  
才用所長聞奏者右臣伏見都官員外郎葉紆謹  
介好學蒞官廉善堪任館閣帖職為郡長吏必能  
公清自持勤恤民隱懷州防禦推官張太中儀州  
軍事推官侯可並資性正直知經術通古今死節  
伏羲有古人之風堪任臺諫官切摩論議為吏治  
民必能盡公竭力三人皆行實素著可備升擢任  
使並是孤立寒士非見任兩府之親亦不是臣親

戚如朝廷擢用後不如舉狀臣其同罪

准宣舉提點刑獄使臣

知江寧府

淮本路轉運司牒淮進奏院牒准御史臺帖准皇  
祐元年九月十一日宣諸路同提點刑獄使臣員  
闕今下御史臺勘會見任知雜已上通行告示於  
諸司副使已下至閭門祗候已上各同罪保舉一  
名有舉主無贓私罪曾經兩任都監等堪充提刑  
任使聞奏者右謹具如前臣伏見本府駐泊兵馬  
都監內殿承制馮文顯勤公幹濟諳曉政事累有



舉主無贓私罪曾經兩任都監臣今保舉堪充提  
點刑獄任使

准宣舉提點刑獄使臣

准御史臺准宣於諸司副使已下閣門祇候以上  
同罪保舉一名有心力勾當得事無贓私過犯累  
任親民堪充提刑任使者聞奏如內有膽勇武藝  
者亦仰開析聞奏者臣伏見供奉官閣門祇候汾  
州駐泊兵馬都監劉舜臣有心力勾當得事無贓  
私過犯累任親民兼知書曉習政事堪充提點刑

獄任使

准宣保舉行陣將領

准御史臺牒准宣於文武升朝官或右職供奉官  
已上同罪保舉知方略有膽勇會武藝好人材堪  
行陣將領軍馬闔敵任使者一名聞奏臣伏見東  
頭供奉官常鼎本出將家頗有武略其常鼎即非  
自己及兩地臣寮親戚臣今保舉堪將領以備闔  
敵

薦舉孫復



伏見諸王宮侍講孫復節行高介經術精深退居  
泰山朝多稱薦恩旨特召處之學官不游貴勢之  
門不言朝廷之事講勸王邸誠須純儒名仕未光  
終嫌清論若蒙擢備館殿有足敦勵風俗臣今保  
舉堪充館閣職任若復後渝素守則臣罪其罔上

准勅保舉知縣縣令

准御史臺牒准勅舉堪充河北陝西河東三路知  
縣縣令二員於前任職官令錄知令錄四考曾有  
三人同罪奏舉者保舉充京官知縣如舉主考數

不及者知令錄舉充職官知縣判司簿尉有出身  
二考無出身三考舉充縣令者伏覩見任絳州太  
常縣令常不伐前池州青陽主簿李向皆有行誼  
識慮勤廉幹濟並無骨肉在朝食祿不伐已三考  
曾有人保舉今堪充職官知縣向亦三考堪充縣  
令

舉呂昌齡充三司判官

伏見群牧判官國子博士呂昌齡材用精敏幹略  
通濟周知財利之事明於輕重之體三司度支糧



料案行諸路糧草總三邊入中其間其有細微利害臣嘗以問昌齡昌齡曉知之臣今保舉克本案判官所異調節三路入中事體無所闕誤如除用後不如所舉臣其伏朝典

官自准勅保舉京官

准慶曆編勅節文一文武官或都在京及外處文武官員政治有聞公忠可舉意不掩善欲達朝廷並須明上封章者右謹具如前臣伏覩本府節度推官張誼蒞事敏勤飭身廉約臣今保舉堪充京

官親民任使如蒙朝廷擢用後犯正入已贓臣其當同罪本官在朝並無親的骨肉食祿與臣不是親戚臣於皇祐元年四月十七日到任不曾奏舉官自充京官及流外選人充令錄班行臣自皇祐二年正月已後不曾舉過官自今所舉本人係今年第一名

請應天府致任官王渙朱買給俸劄子

臣近知應天府竊見本府致仕官尚書禮部侍郎王渙年九十一歲尚書兵部郎中朱買年八十七

歲此二人者早仕于朝清節聞于搢紳退老于家  
善行睦于鄉黨平生履行並無虧玷渙由太常少  
卿除秘書監致仕僅二十年買自兵部郎中不曾  
改官致仕幾十五年臣伏覩朝廷數降德音優恤  
耆艾醪糴之賜下逮庶老此二人遭時休盛克嚮  
多福當國家太平百年之中生而不知兵革艱危  
之事年幾大耄式由禮義可為吾人君子矣伏望  
聖慈俯加恩惠王渙乞與比兩制官致仕朱買乞  
與比大卿監致仕給賜月俸天下如二老臣蓋亦  
希矣聖主不遺年况陛下之孝慈盛德宜有以垂  
光史牒者也

舉王稷臣臺閣

伏見尚書屯田郎中權管勾南京留守司御史臺  
王稷臣性資通敏操守方正和而不雜於俗清而  
不滯於物器識才望士之高選臣今同罪保舉堪  
充臺閣清要省府煩重任使

舉范隱之

伏見太常寺奉禮郎范隱之所著春秋五傳會義



經術深明旨趣淳正今去聖逾遠異端多門常人  
好竒鮮根於道隱之論述獨探精粹且其履行高  
介不群志甚自強進未云止儻蒙樂育必成良材  
伏乞聖慈特命取自所著書登諸衡石之末即成  
有取望特與召試使得備館閣之缺所冀扶獎道  
術敦激風教

薦舉邵炳

臣昨任睦州通判本州青溪縣有前杭州富陽縣  
尉邵炳自天聖中因公累解官後遂隱居不復叙

理躬耕自業講授為事淳文與學儒林之所推伏  
素履懿行鄉邑之所表儀近歲朝廷採拔遺逸偏  
才小善無不收錄有如炳者志尚沖靜不違道以  
干譽不飾竒以近名不交迹於公門不求知於要  
地以故搢紳之論未嘗及之臣贊理本州備知才  
行見善不舉豈曰能忠伏望朝廷特加禮召帖職  
館閣直講上庠在炳學行誠不為忝

薦龔懋許平狀

伏見前坊州軍事推官龔懋太廟齋郎許平皆因



臣寮奏舉召試方略考中高等除前件官並通古  
今有策慮周知時務堪從煩使切見湖南蠻寇為  
朝廷憂宜選才能往資謀畫其龔懋擬授權華州  
觀察推官乞與正除潭州一兩使職官許平久經  
放選未就銓集兼累有臣寮薦舉乞與除潭州一  
初等職官非惟叅贊民政足俾助圖戎事

舉知渭州王龍圖

伏見龍圖閣直學士知渭州王廣淵早承先帝知  
遇屬之心膺其人實有才慮備更任使臣謂宜還

之朝廷處於要近使得効其忠益必有裨於時務

伏見尚書虞部郎中知秀州杜克郎中

伏見尚書虞部郎中知秀州杜克性資方雅吏事  
詳明通曉時務可以守要藩明習格令可以任法  
官精於勾檢可以領財計謹具稱薦以聞

伏見大理寺丞知密州諸城縣趙昶謹厚有常勤

敏任事朝廷方採擢人才收其力用有如昶者但  
地卑孤遠故無聞於時謹以名聞以備選擇



舉陳州崔度助教  
伏見陳州州學教授試國子四門助教崔度通經  
有文周知世務早因胡宿等舉應制科召試祕閣  
不中選韓琦舉薦盛稱其才後緣張昇再奏方得  
此助教名目兩省近臣多有稱薦者度之術業頗  
涉從橫亦跡弛之士也切見每次科場諸以舉數  
推恩者亦便注官示不終弃至如度者賜之一官  
不為忝冒伏望聖恩特與採擢優加一命以收遺  
逸

章奏舉御史

准勅依條於太常博士已上曾歷壹任通判成資  
已上及歷通判壹年已上堪充三院御史保舉兩  
人聞奏如三丞內有合該磨勘者亦許保舉仍須  
自來別無贓濫忠厚淳直通世務明治體之人如  
朝廷遷擢任用之後所舉人犯入已贓並當同罪  
其餘贓私及不如舉狀亦當連坐續准中書劄子  
奉聖旨如少得合入三院之人即許於數內舉升  
朝官知縣已上資叙人壹員充御史裏行者右臣



伏見太常博士簽書相州判官公事韓宗道安和有守通世務知治體太常博士前知鄆州胥城縣馬默資惟淳直勤公愛民並無贓濫今保舉堪充三院御史如朝廷遷擢任用之後犯入已贓其當同罪其餘贓私及不如舉狀亦其連坐

八閩舉劉時中

准勅節文合舉官僚如覩在京及外處文武官政治有聞公忠可舉意不掩善欲達朝廷並明上封章者右謹具如前臣伏覩鄆州通判尚書駕部員

外郎劉時中資守謹重吏文通審才用敏給足以幹事今保舉堪充錢穀刑獄煩難任使如蒙朝廷擢用後犯入已贓臣其當同罪其在朝有弟尚書駕部員外郎處中見食祿與臣不是親戚

臣等准中書劄子以臣等奏舉都官員外郎張頡

堪充侍御史裏行契勘自來無侍御史裏行令別舉官壹員聞奏者臣等昨准勅舉侍御史壹員體訪升朝官鮮得才識資任相當者按唐六典正觀



中太宗始命馬周監察御史裏行殿中及侍御史  
初無此名也中間廢罷至先天中復置始通侍御  
殿中監察並有裏行開元初又置三院裏使皆出  
一時之制本朝有殿中監察裏行而無侍御史裏  
行者非無典故但官至侍御史罕有未歷通判差  
遣者官資自己相當故但充正負爾昨者兩次覃  
慶又不礙磨勘轉官故升朝官多是官高資淺今  
復故事亦合時宜其張頡資履安審才識足用以  
充侍御史裏行可以稱職伏乞朝廷更賜詳議

准勅舉堪任陞擢官

准御史臺牒准勅奉聖旨於文臣內舉才行堪任  
陞擢官壹員者臣伏見祕書省著作佐郎簽書應  
天府判官廳公事蘇轍學識足以觀其才風節足  
以信其行進士及第賢良登科貳拾餘年近出選  
調在於士議誠為滯淹臣今保舉堪任升擢即非  
兩府及自己親戚如蒙陞擢後不如所舉臣其同  
坐

奏差竹曷益州鈴轄馮文顯益州都監



右臣昨捌月拾貳日崇政殿對進呈劄子壹道奉  
聖旨送中書樞密院內貳事為益州兵馬鈐轄乞  
差竹昂替郭周兵馬都監乞差馮文顯替何次公  
者至今未聞朝旨切慮事寢不行須至再具陳論  
昨緣嶺南逋寇在雲南朝廷思患預防屢下本路  
經略臣以為儻有疆場之事鈐轄即是將領之官  
以竹昂昨從狄青往嶺南親與蠻人接戰請知次  
第今郭周已滿任雖有再任指揮便與替回亦無  
損本人資序故臣乞差竹昂替郭周其都監可次  
公早緣犯贓曾除名編管貪猾傾險衆所共知昨  
除益州都監未到任楊察已奏乞別差官程戡又  
奏乞改差人臣雖素不識其人久來知其事狀切  
以益州遠地人情輕危易生疑動鈐轄都監皆係  
兵官臣既此奏論已成嫌釁今往共事實為不便  
伏望朝廷以防微慮遠為意特賜早降指揮上件  
四人竹昂郭周何次公臣並不識惟馮文顯素知  
行止頃嘗奏舉今亦不敢必乞差馮文顯但乞別  
選差官壹員即於事體為便其何次公乞今不候



替人先次發離本任免住本州太上謀人情妾有

生事

四八奏張顥知嘉州

當司勘會轄下嘉州連接蠻界其賴因沐州龍水等寨控扼雲南徑路最是要衝防虞之地土多豪右蕪井之族錯雜夷落頗資撫御累次知州非才事不修舉切見知雅州都官員外郎張顥有才慮幹用處事詳允在雅州已習知蠻夷氣俗所是新差嘉州知州孔叔詹其人見赴任在路近有陵州知州葛禧因患身亡陵州事簡地非要害欲乞朝廷特與就差張顥知嘉州所貴緝寧邊夷守備有方候滿任無事乞特與陞陟差遣却乞差孔叔詹知陵州庶令兩得其所事無闕誤

舉李大臨

右臣昨受命知益州舊例合奏舉通判壹員切見殿中丞祕閣校理李大臨履行端方識用周敏遠方都會事務煩劇實藉通材協力幹濟大臨雖買益州本人操守堅正必不以閭里之私而撓公理

况大藩事體自有長吏今諸州郡因緣陳乞任本鄉知州通判者甚多又此益州與諸郡不同全要諳悉人情通其風俗大臨既是土人足以詳究民間細務伏乞朝廷特賜差充本州通判於見任通判兩員中候成資日替壹員

舉葉紆館閣檢討經筵講讀

臣等伏見尚書屯田郎中宮宅教授葉紆資質淳厚篤志好學安分自守不交人事蒞官臨民政存慈惠儻蒙甄獎可勵浮薄臣等今保舉其人堪充館閣檢討經筵講讀如擢用後犯入已贓臣等並甘同罪不辭

舉朱從道

臣受勅差知滑州地當河防壹貳年來水勢向着只有通判壹員多在河上提舉本州近陞為畿輔增置兵屯今須創葺軍營添修器械諸事藉人管勾伏見屯田員外郎朱從道幹敏有才用濟之勤廉臣今保舉充筮署本州判官廳公事及勘會見任親察推官齊年資考舉主自合該磨勘到任將



貳年乞差朱從道替年成資闕如本人任內犯正  
入已贓臣其同罪

聖躬痊復賀兩府

右某啓伏覩進奏院報狀參月壹日皇帝御紫宸  
殿視朝者清光在望沖氣薦和如日之昇配純明  
於父照惟天為大等健粹以無彊此固乾祇既祐  
之符宗社昌鴻之福伏惟某官至誠當國厚德端  
朝元首股肱雅同心體之泰大厦棟幹實共堂與  
之安仰惟忠孝之虔足感人神之報某虛辱無狀

侍從有年忝守藩條竊均邦慶不任抃躍激切之  
懷

除翰林學士謝賜對衣腰帶鞍轡馬

伏蒙聖慈以臣入院特賜衣壹對金腰帶壹條金  
鍍銀鞍轡馬壹疋者宸檢開榮扉傳召亟承蕃錫  
彌惕愚襟伏以車服以庸名器不假漢儒被寵用  
彰稽古之能唐制踵華仍集拜嘉之始限分職秩  
訟著儀章臣猥以菲才遘于熙旦方翔省戶遽踐  
鑿坡祇命有初頒恩薦及天閑駟駿飾以金錘御



府衣亦副之釘帶備陳榮觀曷稱辱軀期罄朴忠  
仰裨褒遇

兼侍讀學士知秦州謝賜對衣腰帶鞍轡馬  
伏蒙聖慈以臣授兼翰林侍讀學士特賜衣壹對  
金腰帶壹條金鍍銀鞍轡馬壹疋者進職經筵靡  
容於讓避推恩禁坐仍厚於頒宣異數並隆危衷  
增愧竊以服惟章德名器當慎於假人馬以錫侯  
負乘或譏於致寇豈宜辱瑣優獲寵華臣舉術空  
踈材謀譾薄乏論思之奧塵從橐以橫經昧節制

之長委分符而授鉞豈期恩賚更累皇明詔典臬  
以出衣敕司閑而班駿萬釘鏤寶既華束帶之圍  
六轡織文仍賁鳴珂之馭載思匪稱何路為酬期  
師志士之忠少塞風人之利

服除再授端明殿學士龍圖閣學士給事中  
謝賜對衣腰帶鞍轡馬

伏蒙聖慈以臣授前件官并職特賜衣壹對金腰  
帶壹條金鍍銀鞍轡馬壹疋笥衣織麗旣馬  
開九環增鞞璫之容六轡副鏤衢之飾荷恩殊渥

欽宗廟諱



揣報奚勝伏念臣久去葉巖甫周服紀遽被綈封  
之召趣還藻幄之華逮此拜嘉復爾霑錫上公儀  
秩下辨等威服表身章安告既榮於動色乘資體  
養驅馳式遂於代勞祇愧便蕃顧慙辱陋稽古之  
力敢授欽宗榮之言受寵若驚惟思老氏之訓

禮志誕節任子狀

臣偶緣孤迹忝列近班稱慶誕詳喜逢辰之多幸  
希恩任例實干寵以為慙伏念臣有長男邦彥雖  
在幼齡實承單緒賞延諸世重愧於無勞子克于

家竊期於有後仰希慈渥下逮微宗惟以心盟報  
於死所許除翰林學士芴記

除翰林學士芴記

伏蒙聖慈賜臣官告勅牒各一道除臣前件職任  
伏念曩繇薄技被獎淵衷驟躋諫垣亟玷詞掖荷  
光華之誤集顧藻潤以何工敢謂尊號皇帝陛下  
曲降使軺俯傳宸誨俾預禁林之選彌親幄坐之  
威揆顛蒙懼隳職業勉殫素蘊勤報鴻私

除三司使芴記



伏蒙聖恩賜臣官告勅牒各一道除臣前件職任者聚人曰財為國重務非材冒據危懼奚安伏念臣親逢盛期早登近綴曩繇風憲擢領利權契闊十年屯夷一節召從棘道還復計廷精力耗於流年憂責深於疇日寵靈踰分重厲交懷此蓋尊號皇帝陛下天意念勞慈衷軫舊察官成之已試謂歲伐之最深屬茲莞計之煩爰奉時才選敢不力圖抗弊精講盈虛知無不為思所未至庶積涓塵之効少酬蓋載之私

兼侍讀學士知秦州筭記

伏蒙聖慈授臣前件職任者仰服寵榮交增感懼伏念臣親逢盛際早濫華塗中假州符嘗適江湖之遠近還禁瑣復攀日月之光豈謂尊號皇帝陛下猶錄虛名未渝眷睚慙叔子恩信之著委殿邊防昧孟候經藝之長延登講觀惟堅忠竭少謝恩褒

遷禮部侍郎知滑州筭記

伏蒙聖恩授臣前件官任者仰服寵榮交深兢懼



伏念臣逢盛旦早竊虛名久依帷幄之嚴頗蒙雨露之澤今建侯於三輔首祇命於一麾仍繇禁瑣之班進貳春官之秩此蓋伏遇尊號皇帝陛下特申眷獎曲軫寒蹤謂立身之朴忠常留意於掄采載欽乾造愈勵寸誠敬服除授依前端明殿學士龍圖閣學士給事  
伏蒙聖慈賜臣官告勅牒各一道授臣前件官并職者祇荷寵靈載懷惕厲伏念臣早緣素業幸遭亨期待對廣廷甞再塵於聖選叅華近綴實歷踐於要途無補大猷竟罹危議方領麾於南夏奄鍾罰於慈闈曷景不停几筵已徹遽召還於法從復上覘於清光此蓋伏蒙尊號皇帝陛下照揭火明慈均洪覆垂矜簪履之舊俾陪殿閣之嚴敢不鞭策蹇駑砥磨鉛鈍庶勉涓埃之効上酬雨露之恩

樂全先生文集卷第三十一

上丞相呂許公

景祐始年某以茂材異等對詔策中選辱在相國  
陶冶既詣第伏謁翌日見故汝陰蔡貳鄉喜相謂  
曰相國有言以生為遠器相國知生也已時某初  
登科名微迹塞性又野拙未始游王公大人門惟  
蔡公與今參政尚書宋公嘗守南都實鄉里也早  
與諸生旅見二公採鄉人善者之論歸而譽諸朝



值詔下因共稱薦故獨二公憐之及此雖聞汝陰  
言終莫能致身門下然竊自負譬之宴人寄千金  
于他所心有所恃雖宴不恤也此者讀唐書見崔  
文公祐輔作相半年除吏捌伯負德宗性多猜為  
所除吏不無素舊祐輔對曰向非夙相聞知安得  
諳其材行上悟然之識者為是李司空絳作相或  
譖于上以為黨用情故憲宗廷英問之絳對曰夫  
忠臣事君不以私害公若為身避嫌故有才不用  
於公道何有顧所舉用何如爾李趙公吉輔且入  
相謂裴相曰宰相之職在知物以鄉精鑒願有助  
也相為疏名氏得三十餘人不日選用略盡朝野  
翕然趙公有得人之稱故知宰相者行賞罰之柄  
以官人安民成天下之務者也天下之士有高材  
遠策致王經世之志而不以達諸巖廊之上則焉  
攸用巖廊之上權石度量在焉所以平輕重裁尋  
尺均羸縮也未嘗自達而曰莫我知也不亦過乎  
故某益自恨他日相國有見知之言遷延自外至  
于今而志未獲通也今日相國當柄拔用人材近



無親比遠無嫌怨以天下為度以衆心為公浩乎其無不容也淵乎其無不盡也士之有心者當此之日而不能輸肝膈盡思慮以自致于下執事是不適乎去就之宜也彼自古聖賢干時展志有不由先容以進者乎而鄙論曰士當自結主心不因人而達然後磊落倜儻夫不因人而達古則有伊傳太公望矣伊傳太公其初負鼎俎板築釣魚不既勞且迂哉顧直往則違其願必見情而後獲況時異勢殊不量才分刻舟而尋之不亦狂妄歟雖

然士固觀其所自託前景祐五年某以賢良方正再濫詔選而往監相廬郡朝受命而夕行未嘗有干也獨恨廊廟之儀不出相國之化筆爾乃今恩命猥及許之還都趨伏屏下有日矣因鑒往故念士之在卑陋不可以不自發于上發而不遭命也所以近引三相用人之事非敢以區區崔李為量也以明諸賢宰相亦不能盡知天下士士要自啓發然後用人者審其賢不肖而器使之爾至于相國之才之美之德之業上格于朝下被于四方遠



矣亦奚用多云故略焉所有薄業蓋俟執事以獻之謹布腹心為即日登門之先焉

### 上時相

伏以邦家之本廟社之重群吏之職生人之命政無大小繫在廟堂廟堂之上有圖議而後有得失而後有治亂有治而後有安危為國主謀為民主命休戚斯賴其體大矣是以賢德良輔代工造物知九域之廣非耳目所能迨知萬務之微非精意所能周故因天下之聽而後聽無遺聲因天下之視而後視無遺形因天下之謀而後謀無遺情擊要以圖太平心而格物會其有極統之有宗而宰天下之道舉矣故古之居此位者咨嗟寤寐惟以失一士之為嫌也此豈徒掠好善以為名收群心而邀惠者哉蓋誠於報國忠於利民將以通天下之志而成天下之務者已彼天下之士有志乎道有心乎民有致君建治之猷無可行之位有通權適變之術無專達之途未能有以得於君姑念有以效於執事者則夫挾利害之論游王公之門者



豈盡諂附謀身之人遊說規利之伍哉夫亦有盛  
士在焉且特君以文明仁聖臨天下而大君子當  
國任政秉制四海萬邦黎獻共為臣僕惟吾君與  
吾相特舉凡厥庶士庶民有猷有守莫不皇受其  
福以迓天子之光况有探先聖典術明當世理  
道辨天人之分曉古今之故如是之士吾君與吾  
相其舍諸故其秉國之鈞官材賦政者惟誠士之  
務得學古之道義在有為者惟才志之務効上得  
其求下得其用天下其有不治也乎及夫功利以

立職業以修國體以平王道以粹教名享德盛美  
所歸不在吾相乎士何有乎哉故周以多士共致  
太平而周召紀乎崑旂漢用衆力克成大業而蕭  
曹食乎宗廟譬之太上御名屢劉削茨墁執伎咸作而  
梓人專成室之功譬之用師伍兩卒旅奮命並進  
而主將尸制勝之伐故春秋之義尊不親小事卑  
不專大名典禮之舊卑主其詳尊治其目國之大  
體人之大倫分儀等威不可越已是以卿大夫分  
處其職百執事各力其局至于坐而論道使人以



器收謀擇善取賢斂材者真我政府之事也伏惟  
某官蹈道之深得德之全志如春秋文如典謨知  
幾如易多識如詩中禮之莊和得樂之易良為帝  
股肱為天筆舌至于古先之龜鑑舉知其故矣時  
世之夷病洞照其情矣蕞爾一下吏奔走承序之  
不給乃欲議天下之事冀以動吾相之聽其亦不  
知量也某誠不肖涵漬美化游涉藝文頗嘗苦心  
期庶幾於古人之所用意者帝王之典制聖賢之  
事業禮刑始末之用往今治忽之變諸流群氏經

言小說葺竊揭厲乎淺深鑽仰乎高堅舉其芳英  
咀其滋味矣景佑初元天子復下詔舉方聞之士  
猥蒙近臣聞名法座因得入紫宮趨赤墀當四政  
之問條三道之對承學踈淺分從報罷朝家樂育  
試之大邑歲穰訟希蕭然事簡因復剽拾舊籍鋪  
綴陳迹採道路之議成秕稗之說恃時不忌必寬  
狂妄之誅於政大方儻有涓埃之補前所謂有志  
乎道有心乎民此固賢人君子之事某不敏亦竊  
冀焉幸值某官以引拔自任以教育為樂謀無鄙

而不收善無微而不擇此誠大義至公希闊之過  
某所以不敢自外而至于屏下也猶有及之然矣  
謹以近所著芻蕘論十卷二編以獻非惟備摯見  
之禮也儻變理之暇一賜采觀亦足以開巖廓之  
餘論焉

上蔡內閣

文忠公

竊以師道之廢久矣昔在兩漢公卿大臣咸門有  
諸生橫經授業書名綠牒至數千人師儒教尊人  
知重學故在兩漢其政事本於經術其議論據於

王制朝有名節之勸士篤去就之行美化雅俗比  
隆三代魏晉而下中區版蕩諸戎擾亂隔為南北  
小雅盡廢文獻不足近在唐氏風流寤薄取士之  
制專用虛辭雖開元元和變而幾道名公宗匠磊  
落相望然治學傳家本原已廢諸生後進奔走末  
路以文求售勢同市賈然猶屈伸繫乎託跡進退  
謀於所知名士口吻片言可以取重清流門地一  
見可以為榮士風綽兮顧亦近古清朝一統丕冒  
無外鳥言鳩舌知誦乎簡書鬢首弁裳咸襲乎端



甫然循唐取士而考言稱華駕說之學用微師資  
之禮遂絕非有志乎遠者大者莫不嗜其而排苦  
採芳而遺實也天未喪道必將有主主吾道者閣  
下安得而讓諸伏惟閣下風采發乎冠歲光華耀  
乎區域早結明主奮揚亨衢其發策決科也則江  
都之研經理家令之切世務其代言密侍也則文  
園之視草中壘之納忠其撫藩屏也則潁州之教  
河南之威其毗大政也則高陵之儒雅平陵之故  
事茲可謂周才而通智者矣某不佞竊伏東鄙承  
望下風蓋有年矣蓄為潢汙莫能自通乎江海覆  
諸盜在無以上覘乎日星今罷官吳中言歸故里  
乃值閣下實此尹正既再獲見矣而莫能展叙乎  
腹心也得不少因文墨以自薦其誠歟某世有仕  
籍堂有尊親懼先緒之墜地且養羞之不給爰謀  
干祿蓋為代耕既隨計而西不得志于有司退居  
于灘上仕意益薄矣景祐改元天子復下詔舉方  
聞之士朝廷二三賢公猥錄名字章聞于上由是  
獲對法宸躬承大問三道之要四政之闕承學良

淺非識所迨報罷為幸懼及知已育材道廣取人  
路寬一命讐書庇身羨邑飽食海上坐逾三年時  
哉歸歟乃遇盛德某聞之聲同相應高下不必均  
氣類相從體質不必齊故螭螭侯陰而出柱礎因  
雲而潤況心志之靈能無所感自國家之開詔舉  
由是路而進者蓋有人數矣今日之事又閣下之  
所發此其之所以伏幽陋而望下風引領庶幾歲  
月以冀以未嘗得見為恨亦惟閣下所以撫接之  
意其必有以當之者矣謹錄近所著芻蕘論十卷  
兩編以獻冀閣下少知某之於古之道天下之務  
抑為有心者焉某前所以援漢唐之事歎師道之  
廢者是區區鄙中竊望於閣下者儻閣下有振復  
古道之意而獲預焉受賜之大無尚此已不勝感  
激之懷

上留府侍讀宋尚書

宣獻公

伏聞士林之議者曰厥今國朝大臣得時居位以  
文章名一世者閣下當其任焉然而天下知名之  
士由門下出者良鮮意者閣下之名德光大屋岸



峻絕士難其進耶或乃閣下日居侍從對命密勿  
未暇周見四方之士也今者出試以政尹茲京邑  
以客至者率與為禮乃知嚮者之說議者之不審  
爾且天之生民也使先知覺後知先覺覺後覺也  
既先知而先覺矣專諸已而不外施焉君子不應  
爾昔兩漢公卿咸門有諸生橫經受業荆蜀交闔  
司馬氏之不競先王事業頽廢墜地中間數百歲  
寂寥榛梗唐室治定文物更新名公宗師磊落相  
對鏘金鳴玉聞黃鍾大呂之音兩敦六瑚見薌合

明棗之薦先後引翼嗣音不絕五季荒剥僅如戰  
國文獻不足小雅蕩然神而明之存乎其人則閣  
下安得讓焉某不佞幼從事於學竊志其大者亦  
嘗參酌古今治亂之道聖賢勸戒之法期自樹立  
不落流俗而性識蔽昧莫自開爽遲先知而先覺  
者則謹將聽命焉今茲之遇閣下獲所素願者矣  
夫三尺之限健夫不能越者以其峻爾崇山延岡  
重載登焉遷池故也閣下試為霽威少迴顏色不  
以貴有位之勢間然而以古人之道與其進也如

小人者固不足以仰望清明之德儻與持論亦足以發謹以所著歌詩論議貳編贊獻歌詩所以言情性議論所以明理道惟大君子辱垂意也

上北海范天章

伏以聖人消息盈虛之道動靜吉凶之機察時觀變妙用在易某小人不知其大者今茲將以瑣瑣之迹有請于下執事敢用上所以布德說下之義下所以處困謀亨之說推而陳之以發鄙誠伏惟閣下少留念哉曷謂上所以布德說下之義某請

稽諸益益之九五曰有孚惠心勿問元吉有孚惠我德說者曰為益之大莫大於信為惠之大莫大於心因人所利而利之惠而不費惠心者也以誠惠物物必應之故曰有孚惠我德也曷謂下所以處困謀亨之說某請質諸困困之上六曰困于葛藟于臲臲曰動悔有悔征吉說者曰行則愈繞如葛藟然居不獲安如臲臲然凡物窮則思變困則謀亨曰者思謀之辭也言將何以亨至困乎曰動悔吝生有悔以征則濟矣易曰吉凶悔吝生乎動



然則悔無大小動則有之至如惠心為益之道閣  
下之名德人所仰信不在乎端策振龜而知也友  
人聞某之為是說問子說信行乎某曰請以二象  
言之在益彖曰損上益下民說無疆自上下下其  
道大光是益易行也在困彖曰困有言不信尚口  
乃窮是困難謀也得益之時者信則人仰之惠則  
人德之得困之時者可退自謀不可進謀於人今  
茲小人以困而求益自下而取上惡乎敢知說之  
行也問者曰然則子推是說顧將安之某曰不見  
仁者知者斯可矣知者知人愚以困動將求知者  
知之耳不見知者仁者斯可矣仁者安人愚以困  
動將求仁者安之耳如仁知之不可見誠者斯可  
矣誠者成物愚以困動將求誠者成之耳念茲三  
者興而四顧莫適所懷已而聞諸知己曰夫惟體  
仁之恕抱知之明稟誠之厚挺特達之正氣冠天  
下而為英則惟北海之范公歟某拈曰是鄙人之  
願為日夕者也是以違親老之膝下越千里以茲  
來一則若元叔託名于羊西州望公之延薦二則

如退之乞憐於于南郡希公之調恤惟是二者皆  
閣下咳唾指顧之餘耳閣下其亦有意乎長跪伏  
聽惟閣下所以命之

寄上蔡參政

伏念去門庭官于海上倏二年于茲矣每思盛德  
垂撫之厚忽若侍座下見顏色不知精神之馳乎  
屏樹也公且信是夫乃者某困窮不能養彷彿乎  
天下而未始有遭也公獨恤然憫而衣食之乃者  
某嘗有志乎學古之道斐然為辭章亦既自達乎

聞人作者而莫之或信也公獨樂而教育之至以  
聞天子取科名祿仕內之懷中公之遇某也如此  
某之有心于公也非諂而信矣且今之公卿大夫  
其在上位者幾人材能雋雄者聲光章灼者即曰  
有矣若乃大方全體仁合義精粹不耀如璞玉  
渾金明淨無瑕如青天白日誠淳優大萬美光足  
則惟公一人是故一觀公之氣韻者鄙吝之心悉  
去一聞公之緒言者忠信之志皆起此某所以竊  
竊焉託名投迹如七十子之不可去仲尼豈特顧



望公之貴勢而趨之者乎雖然公於今者當造化之爐冶執裁制之尺度遠朝之清流貴客侍讌間而陪議論於前四方之英才雋人效伎能而贊功德于後是安得念某之在江湖之上竊竊然哉某所守邑三面江海西與州接渺然大澤不通騎步路所窮絕故無賓游俗不識書無有士子民無大猾廷無滯訟適復善歲蕭然省事令之賦祿足以供其脆仁族屬令之事任足以撫疲羸為善事以此言之則是邑也天下之美地而今也者仕官而得民者也若是又何求焉蓋某之志于學其思進而未止者也今幸公宰政居中大鈞播物某誠願以縣大夫之祿執經鄉校與好學者游切磋講習詠歌先王之道聊以卒歲至乃馳狗於燁燿之地趨趨乎聲利之途一介之守所不能也因感公恩知之厚又欲以一披雪乎鄙懷之久存者故寫誠於茲書伏惟論道之餘賜采覽焉

與蔣吏部

某野而訥於辭是以再見而未能自達乎腹心也

執事亦且何以見處哉遂無言而去竊有所不足  
敢少布誠乎執事者而行焉某志軒曠而難遂性  
剛介而鮮合器不適乎諸用藝不精乎一家至于  
有意乎古之道有心乎天下之務雖則鄙愚竊自  
謂可從於能者之後焉始在鄉閭不求名譽有田  
一壠無宮一畝隨賦干祿緊我慈親旨甘之故非  
所以求顯榮為進取者天聖五年春不遇春官氏  
歸耕於濰上值濟陽蔡公常山宋公繼來保釐採  
鄉人善者之論輒辱解榻以待已而天子下詔取

方聞之士二公唱於朝與一二賢卿大夫猥以不  
肖稱於帝前由是得涉赤墀歷文陛仰戶牖之法  
座條三道之大對一命而獲長是邑且嘗更三太  
守矣其治可言也范之為政也敏而其失也踈陸  
之為政也寬而其弊也弛執事之為政暮三月矣  
一之日符令之下于縣者三減其二焉二之日追  
胥悍吏不至于縣令之庭三之日事有條而令有  
章不敏以是知執事之能有成也其無弊也不敏  
之所願從之者也執事之始至也某不能來賀今



之來也閣下如有望焉再見而不及以政且駸幾  
不言叔向不知其賢趙子不言魏絳不知其材某  
獨得不言而責執事之不知我乎今以近所著芻  
蕘論兩編十卷冀執事少知不敏之於古之道天  
下之務六經之奧諸家之言歷代治亂之由百王  
沿革之法亦嘗曾慷慨持論究詳用心也已不敏  
之為是書將以獻于上惟執事當世之名儒識者  
且欲咨而考之凡此書之有所不宜言言而非者  
有所發焉某得以存其是而黜其非是求益之舉

也

與蘇州太守陸學士

惟古今天下之政事所以亂率由下情不上通下  
情所以不上通由上者矜貴自賢在下者譎偷求  
容故帝堯之為君謀于衆捨己從人伊尹之為臣  
匠夫罔不獲自盡惟慮下情之塞也朝廷耳目在  
牧守牧守耳目在縣令縣令與民最親也自漢以  
來郡縣雖相攝制而各得為政刺守比課督姦而  
已故州雖無良貳千石而不害縣有善令吏民以

是親信風績以此成立蓋上下之政不相侵故賢  
不肖較然上之廢謫賞擢亦得以無濫近者唐室  
失保民之道方鎮分地一道百城慘舒恩威盡出  
節廉連率之命悍卒鴟張黷夫狼貪郡縣長官役  
屬如隸人關扼動靜臂指伸縮奔走號令制不在  
已故唐僅三百年紀于循吏者無幾且治迹功狀  
去漢遠矣豈無良士豈無仁人原其由然蓋事有  
牽制才不專用也今朝廷分局布吏提綱振目等  
級如堂陛輕重如權衡都邑相維動有繩準然典  
刑具在亦繫人弛張縣非其人州得以請黜州非  
其人縣受其弊矣故知與天子共理者實牧守也  
其權不足以合道才無長於經術射策王庭解褐  
通邑亦惟天幸遭二名侯自明公于藩再獲請見  
接君子之几席聞長者之餘論至于誠淳優博溫  
厚敦易亦少得明公之所志者如是而下情不達  
一州之政不和則無有也且夫子之道至大而曾  
子稱之曰忠恕而已矣得非以忠恕之道可以摠  
百行之要者歟忠以事上恕以體下雖在閭巷之



內蠻貊之邦行矣而况紆墨綬長百乘之邑有民人焉有社稷焉是亦當效忠之地得用怒之位者也矧郡縣相附義猶心體休戚同處得失槩及上可言而不言下當從而不得阻下情塞上聽豈忠恕之謂耶輒條近符教之不宜于縣尤甚者五條以聞于左右儻明公寬其干冒不揮而進之也則謹當時有聞焉若其出位而謀越職而議其非矯激沽鬻者固不是為也竊景夫忠恕之義不可徒默焉

與邵監簿

某白青溪邵君足下大雅之道微久矣士之逐利過於市井足下蕭然弃官隱居以求其志不為賢哉鄙人不佞忝貴州上介側聞高義竊用嗟挹甫此署事嘗遣單札自惟微者不足以薦發有德上聞王朝徒以聲顛之同默懷景重爾向蒙不弃繼損二書辭相推多披展增愧然反復足下自叙出處之意鄙人或為何始有掩巖扃之樂又懷趨帝庭之願是於考槃之際而習進取之業斯乃邈而

有所係非確乎不可拔者已夫聖人所貴乎道者  
莫節乎中莫適乎時時行則行時止則止其斯之  
謂中也夫蓋足下養高林園久安內樂以道自信  
謂今猶古故於世態人事有所未悉者鄙人之皓  
皓之白而蒙乎世俗之塵埃凡近之仕體頗能言  
之請嘗以語諸足下今四方無事朝廷守畫一之  
法以為政當柄任者高枕優游故其揀別英豪不  
甚為急事即有管樂之材器良禹之謀識舒雉之  
經術二司馬之文藝詎錯之時務魏翟之風力欲  
其特達拔擢果自樹立殆未必然足下獨不見布  
衣白首奔走折腰者豈無俊雄也哉足下又不見  
朝為諸生以一日之藝而取公卿者豈盡俊雄也  
哉士之仕者如是假諸葛武鄉而在徒死隆中爾  
足下乃欲挺出山齋直排天閣謁法座計不過歟  
足下遂能脫屣榮利長往不顧自逸於是非得喪  
之外即鴻飛冥冥弋者無所慕矣如猶未忘於此  
世也愚謂且相時而動見可姑進况足下道甚高  
忠信篤厚名君子儒蠻貊之邦斯行矣錢塘大府



也朝之顯貴時此撫臨是珠玉之肆衣冠之數也  
且學官之禮不與群掾吏同責授命分職異乎往  
教數學功半未妨著書之志愚謂外臺之請抑繁  
陸之漸平津再上時且耳順漢陽勲業成于暮齒  
歲寒而後知松柏之有心也是下聊加策馬來書  
所示庠序師儒之闕鄙人不量向亦獻言于朝雅  
如高議置勿用爾所叙頗激訐其盡事情以開足  
下意惟三思乎時與中擇所去就焉

其  
荅孫生秀才

某白孫生秀才足下北蒙臨訪中乃少違曾未逾  
時繼辱三牋若後進之生勤勤乎儒老重德趨名  
之士汲汲乎當塗在勢者某豈所敢當於足下者  
耶始閱足下之文又數接乎辭氣鄙心固畏而愛  
之矣僕少有事四方自宋衛陳蔡滎洛陝蒲河之  
北山之東淮服之南歷遊也已至于是邦必問其  
俊豪而從之莫不挹其流而得其淺深嘗其實而  
知其臭味今試追數度足下之比蓋無幾人焉若  
僕者行荒漫而無守學謬悠而不精靡有遠人豈

曰成器復自守邑海上益情益愚嘗思得敏識英  
材雅流通士與較時講古以開蒙撥滯今生惠然  
來過方稱所願何乃不以文義相切劘直諒相悱  
發顧過言溢美待我為小丈夫驕子弟何相期之  
淺耶久矣哉世教之陵遲士之風節寢薄親愛以  
利隙交舊以勢傾或一命之僅霑視平生如素昧  
此乃僕嘗悲吁傷懷者又可以暮之飽而遽忘朝  
之飢也乎足下其勿淪胥于俗動蕩乎風波誠能  
捨外偽而出中誠去禮之過者以友生納僕則僕  
何敢不盡於生耶凡聞闕敗數忠告之有望於足  
下也昨病無悰為報也緩今聊強書使足下知所  
志而已其亦察之

上河中同理范學士

文正公

始者學士執親之喪于南都暇日以道義教徒于  
鄉之庠誘人樂善孜孜不足其適奔走于朝夕之  
養望先生之門牆曾不得升諸堂而望乎室晚日  
方獲持鄙文薦于左右竊嘗辱一言之與其進也  
雅不以晚輩見得感荷知獎甚深厚去春隨計輦



下奉謁者三先生座上客多小人塵中趣背加復  
慵拙不善候間隨波上下旅為進退竟不得叙款  
勤布腹心之深淺也矧敢規先生之門為託名之  
地耶蒲坂會府中條勝地伏惟大匠游刃多閑燕  
申之餘脩講寧廢經術興於南郡士林歸乎北海  
慕仰高義心用激發他日孤蓬西轉適彼樂國以  
一日之舊有請于執事者先生尚留意而記憐之  
耶詩云未見君子憂心忡忡亦既見止我心則降  
其是謂乎故用布心自達庶知卑誠所存良深愧

悚不宣

蘇不

蘇不





